

四庫全書

史部

欽定四庫全書

元史卷六

明翰林學士亞中大夫知制誥兼修國史宋濂等修

本紀第六

世祖三

二年春正月辛未朔日有食之癸酉山東廉訪使言真
定路總管張宏前在濟南乘變盜用官物詔以宏嘗告
李壇反免宏死罪罷其職徵贓物償官邳州萬戶張邦

直等違制販馬並處死勅徙鎮海巴勒巴沁謙州諸色
匠戶於中都給銀萬五千兩為行費又徙諾觀特木德
克礮手人匠八百名赴中都造船運糧己卯北京路行
省給扎拉齊戶東徙行糧萬石以鄧州監戰諾海新舊
軍萬戶董文炳並為河南副統軍甲申詔申嚴越界販
馬之禁違者處死乙酉以河南北荒田分給蒙古軍耕
種戊子諸王塔齊爾使臣庫庫楚至北京哈陶驛手殺
驛吏郝用郭和尚有旨徵鈔十錠給其主贖死庚寅城

西番希達路癸巳布敦奇爾部雅蘇來朝貢銀鼠皮二千賜金素幣各九帛十有八武城縣王氏妻崔一產三男丁酉給親王裕隆哈實部民糧二千石高麗國王王禎遣其弟公珣奉表來貢二月辛丑朔元帥阿敦與宋兵戰于釣魚山敗之獲戰艦百四十六艘甲辰初立宮闡局戊申賜親王烏魯克台河間王印給所部米千石丁巳幸上都癸亥并六部為四以敏珠爾丹為吏禮部尚書馬亨戶部尚書嚴忠範兵刑部尚書帕魯鼎工部

尚書禁山東東路私煎硝磺甲子以蒙古人充各路達
魯噶齊漢人充總管回回人充同知永為定制以同知
東平路宣慰使寶赫鼎為平章政事山東廉訪使王晉
為參知政事廉希憲商挺罷詔併諸王哲伯特穆爾所
設管民官屬詔諭總統所僧人通五大部經者為中選
以有德業者為州郡僧錄判正副都綱等官仍於各路
設三學講三禪會三月癸酉古桂國人襲殺濟喇敏部
兵勅以官粟及弓甲給之丁亥勅邊軍習水戰屯田誅

宋謀李富住乙未罷南北互市括民間南貨官給其直
遼東饑發粟萬石鈔百定賑之夏四月戊午賜諸王哈
必齊伊奇哩金素幣各四拜牲金幣一五月壬午賞萬
戶和琳岱爾所部征吐蕃功銀四百五十兩戊子禁北
京平灤等處人捕獵庚寅令軍中犯法不得擅自誅戮
罪輕斷遣重者聞奏勅上都商稅酒醋諸課毋徵其權
鹽仍舊諸人自願徙居永業者復其家詔西川山東南
京等路戍邊軍屯田閏五月癸卯升禧縣為景州辛亥

檢覆諸王烏魯克台部貧無孳畜者三萬七百二十四
人人月給米二斗五升四閱月而止丙辰雅州碶門宣
撫使請復碶門城邑詔相度之癸亥移秦蜀行省於興
元丙寅命四川行院分兵屯田丁卯分四親王南京屬
州鄭州隸哈坦鈞州隸明埒睢州隸博囉齊蔡州隸海
都他屬縣復還朝廷以平章政事趙璧行省于南京河
南府大名順德洺磁彰德懷孟等路平章政事廉希憲
行省事于東平濟南益都淄萊等路中書左丞姚樞行

省事于西京平陽太原等路詔諸路州府若自古名郡
戶數繁庶且當衝要者不須改併其戶不滿千者可併
則併之各投下者併入所隸州城其散府州郡戶少者
不須更設錄事司及司候司附郭縣止令州府官兼領
括諸路未占籍戶任差職者以聞六月戊辰朔新得州
安撫向良言頃以全城內附元領軍民流散南界者多
欲歸順並乞招徠從之又勅良以所領新降軍民移戍
通江縣行新得州事辛未賜阿珠所部馬價鈔一千二

十三錠有奇丙子太陰犯心大星戊寅移山東統軍司
於沂州萬戶重喜立十字路復正陽命圖喇戎之己卯
以淇州隸懷孟路高麗國王王植遣其臣榮肩伯奉表
來賀聖誕節千戶庫庫楚部民乏食賜鈔賑之王晉罷
樞密院臣言各路出征逃亡漢軍及貧難未起戶并投
下隱匿事故者宜一槩發遣應役從之勅行院及諸軍
將校卒伍須正身應役違者罪之秋七月辛酉益都大
蝗饑命減價糶官粟以賑癸亥安南國王陳光昞遣使

奉表來貢甲子詔賜光晒至元三年厯八月丙子濟南路鄒平縣進芝草一本戊寅高麗國王王植遣使來貢方物己卯諸宰職皆罷以安圖為中書右丞相巴延為中書左丞相戊子召許衡於懷孟楊誠於益都車駕至自上都九月戊戌以將有事太廟取太樂工於東平預習儀禮勅江淮沿邊樹柵徐宿邳三州助役徒庚子皇孫特穆爾生丁巳賞諸王哲伯特穆爾麾下河西戰功銀二百五十兩冬十月己卯享于太廟癸未勅順天張

桑東平嚴忠濟河間馬總管濟南張林太原舒穆魯總
管等戶改隸民籍統軍招布哈萬戶輝圖麾下軍所俘
宋人九十三口官贖為民其私越禁界掠獲者四十五
人許令親屬完聚並種田內地戊子詔隨路私商曾入
南界者首實免罪充軍十一月丙申召李昶於東平辛
丑賜諸王哲伯特穆爾銀二萬五千兩鈔千錠癸丑賞
楊文安戰功金五十兩所部軍銀六百兩及幣帛有差
甲子詔事故貧難軍不堪應役者以兩戶或三戶合併

正軍一名其丁單力備者許顧人應役十二月己巳省
併州縣凡二百二十餘所庚午宋子貞言朝省之政不
宜數行數改又刑部所掌事千人命尚書嚴忠範年少
宜選老於刑名者為之又請罷北京行中書省別立宣
慰司以控制東北州郡並從之禁朝省告訐以息爭訟
辛未以諸王伊蘇布哈所部戍西番軍屢有戰功賞銀
三百兩癸酉召張德輝於真定圖克坦公屢於衛州丁
丑詔諭高麗賜至元三年歷癸未賜劉秉忠金五十兩

甲申賜巴延宋子貞楊誠銀千兩鈔六十錠丁亥勅選
諸翼軍富強才勇者萬人充侍衛親軍己丑瀆山大玉
海成勅置廣寒殿是歲戶一百五十九萬七千六百一
絲九十八萬六千二百八十八斤包銀鈔五萬七千六
百八十二錠賜諸王金銀幣帛如歲例彰德大名南京
河南府濟南淄萊太原弘州電西京北京益都真定東
平順德河間徐宿邳蝗旱太原霜災斷死罪四十二人
三年春正月乙未高麗國王王植遣使來賀丙午遣多

木達趙壁撫諭四川將吏軍民壬子立制國用使司以
阿哈瑪特為使癸丑選女直軍二千為侍衛軍四川行
樞密院謀取嘉定請益兵命多木達趙壁摘諸翼蒙古
漢軍六千人付之二月丙寅廉希憲宋子貞為平章政
事張文謙為中書左丞史天澤為樞密副使癸酉立潘
州以處高麗降民壬午平陽路僧官以妖言惑衆伏誅
以中書右丞張易同知制國用使司事參知政事張惠
為制國用副使癸未車駕幸上都甲申罷西夏行省立

宣慰司初製太常禮樂工冠服立東京廣寧懿州開元
率賓海蘭博索等路宣撫司乙酉蠲中都今年包銀四
分之一詔理斷阿珠部下所俘人口畜牧及其草地為
民侵種者以制國用使司條畫諭中外官吏三月辛巳
分衛輝路為親王裕隆哈實分地戊戌賑碩達勒達饑
己未王晉及侍中和爾扎實濟南益都轉運使王明以
隱匿鹽課皆伏誅夏四月丁卯五山珍御榻成置瓊華
島廣寒殿亳州水軍千戶胡進等領騎兵渡淝水逾荆

山與宋兵戰殺獲甚衆賞鈔幣有差庚午勅僧道祈福
於中都寺觀詔以僧機為總統居慶壽寺己卯申嚴瀕
海私鹽之禁勅宮燭毋彩繪五月乙未遣使諸路慮囚
庚子勅太醫院領諸路醫戶惠民藥局辛丑以黃金飾
渾天儀丙午浚西夏中興漢延唐來等渠凡良田為僧
所據者聽蒙古人分墾丙辰罷益都行省蠲平瀋益都
質子戶賦稅之半六月丁卯封皇子諾木罕為北安王
以印給之辛未徙歸化民於清州興濟縣屯田令官給

牛具壬申賜劉整畿內地五十頃癸酉以千戶扎拉沒
于王事賜其妻銀二百五十兩丙子立漕運司戊寅以
陝西行省平章賽音諤德齊等政事修治賜銀五千兩
命山東統軍副使王仲仁督造戰船于汴申嚴陝西河
南竹禁立拱衛司秋七月丙申罷息州安撫司壬寅詔
上都路總管府遇巡幸行留守司事車駕還即復舊丙
午遣使祀五嶽四瀆甲寅添內外巡兵外路每百戶選
中產者一人充之其賦令餘戶代輸在都增武衛軍四

百己未以崞代堅臺四州隸忻州詔令西夏避亂之民
還本籍成都新民為豪家所庇者皆歸之州縣詔招集
逃亡軍限百日詣所屬陳首原其罪貧者併戶應役八
月癸亥賜丞相巴延第一區丁卯以兵部侍郎赫德禮
部侍郎殷弘使日本賜書曰皇帝奉書日本國王朕惟
自古小國之君境土相接尚務講信修睦況我祖宗受
天明命奄有區夏遐方異域畏威懷德者不可悉數朕
即位之初以高麗無辜之民久瘁鋒鏑即令罷兵還其

疆場反其旄倪高麗君臣感戴來朝義雖君臣而歡若
父子計王之君臣亦已知之高麗朕之東藩也日本密
通高麗開國以來時通中國至於朕躬而無一乘之使
以通和好尚恐王國知之未審故特遣使持書布告朕
心冀自今以往通問結好以相親睦且聖人以四海為
家不相通好豈一家之理哉以至用兵夫孰所好王其
圖之又詔高麗導去使至其國戊子高麗國王王植遣
其大將軍朴琪來賀聖誕節阿珠畧地斬黃俘獲以萬

計九月戊午車駕至自上都冬十月庚申朔降德興府
為奉聖州癸亥高麗使還以王植病詔和藥賜之丁丑
徙平陽經籍所于京師更勅牒舊式太廟成丞相安圖
巴延言祖宗世數尊謚廟號增祀四世各廟神主配享
功臣法服祭器等事皆宜定議命平章政事趙璧等集
羣臣議定為八室申禁京畿畋獵壬午命制國用使司
造神臂弓千張矢六萬十一月辛卯初給京府州縣司
官吏俸及職田戊戌瀕御河立漕倉丁未申嚴殺牛馬

之禁宋子貞致仕辛亥以呼圖克岱爾為中書左丞相
禁天文圖讖等書丙辰千戶沙卜珠丹以嗜酒失所守
大良平罪當死錄前功免死令往東川軍前自效詔建
都使復歸朝又詔嘉定等府沿江一帶城堡早降又詔
四川行樞密院遣人告諭江漢庸蜀等效順具官吏姓
名對階換授有功者遷有才者用民無生理者以衣糧
賑之願遷內地者給以田廬毋令失所十二月庚申給
諸王哈必齊行軍印辛酉詔改四川行樞密院為行中

書省以賽音諤德齊伊蘇岱爾等僉行省事甲子立諸路洞冶所以梁成生擒宋總轄官授同知開府事佩金符減輝州竹課先是官取十之六至是減其二丁亥詔安肅公張柔行工部尚書段天祐等同行工部事修築宮城併太府監入宣徽院仍以宣徽使專領監事詔賜高麗以至元四年厯日仍慰諭之建大安閣于上都鑿金口導盧溝水以漕西山木石敕諸越界私商及謀人與偽造鈔者送京師審覈是歲天下戶一百六十萬九

千九百三東平灤真定洺磁順天中都河間北京蝗京
兆鳳翔旱斷死罪九十六人賜諸王金銀幣帛等如歲
例

四年春正月甲午陝西行省以開州新得復失請益兵
勅平陽延安等處僉民兵三千人山東河南懷孟潼川
調兵七千人益之丁酉申嚴平陽等處私鹽之禁壬寅
立察蘇圖水十四驛癸卯勅修曲阜宣聖廟乙巳百濟
遣其臣梁浩來朝賜以錦繡有差禁僧官侵理民訟辛

亥封安肅公張柔為蔡國公以趙璧為樞密副使立諸
路洞冶都總管府癸丑勅封實默圖山為武定山其神
曰武定公泉為靈淵其神曰靈淵侯僉蒙古軍戶二丁
三丁者出一人為軍四丁五丁者二人六丁七丁者三
人乙卯高麗國王王植遣使來朝詔撫慰之戊午立提
點宮城所析上都隆興府自為一路行總管府事立開
元等路轉運司城中都二月庚申鈕祜祿納罕復為平
章事阿里復為中書右丞丁卯改經籍所為弘文院以

馬天昭知院事丁亥括西夏民田徵其租帝幸上都詔
陝西行省招諭宋人又詔嘉定瀘州重慶夔府涪達忠
萬及釣魚禮義大良等處官吏軍民有率衆來降者優
加賞擢三月己丑復以耶律鑄為中書左丞相辛卯自
潼關至蘄縣立河渡官八員以察姦偽乙未勅中都路
建習樂堂使樂工肄業其中己亥賜皇子珍戲莽噶拉
木諾木罕和克齊銀三萬兩辛丑夏津縣大雨雹壬寅
安圖言比者省官員數平章左丞各一員今丞相五人

素無此例臣等議擬設二丞相臣等蒙古人三員惟陛下命詔以安圖為長史天澤次之其餘蒙古漢人參用勿令員數過多又詔宣用老成人如姚樞等一二員同議省事丁巳耶律鑄制宮縣樂成詔賜名大成夏四月甲子新築宮城辛未遣使祀岳瀆五月丁亥朔日有食之勅上都重建孔子廟乙未應州大水丙申威州山後大番斯隆瑪等十一族來附賜璽書金銀符已酉以捕獵戶達嚕噶齊偽造銀符處死壬子勅諸路官吏俸令

包銀民戶每四兩增納一兩以給之丙辰析東平之博
州五城別為一路六月壬戌以中都順天東平等處蠶
灾免民戶絲料輕重有差乙丑史天澤復為中書左丞
相呼圖克岱爾耶律鑄並降平章政事己延降中書右
丞廉希憲降中書左丞阿里張文謙並降參知政事乙
酉賜諸王裕隆哈實銀五千兩幣三百歲以為常罷宣
徽院赫德殷弘以高麗使者宋君斐金贊不能導達至
日本來奏降詔責高麗王王植仍令其遣官至彼宣布

以必得要領為期秋七月丙戌朔勅自中興路至西京之東勝立水驛十戌戌罷息州安撫岳林以其民隸南京路罷懷孟路安撫李宗傑以其民隸本路發鞏昌鳳翔京兆等處未占籍戶一千修治四川山路橋梁棧道大名路達魯噶齊愛魯克總管張弘範等盜官錢罷之壬寅申嚴京畿牧地之禁甲寅詔額齊訥新附貧民從人借貸困不能償者官為償之仍給牛具種實及糧食僉東京軍千八百人充侍衛軍八月庚申填星犯天鐸

辛酉申嚴平灤路私鹽酒醋之禁丙寅復立宣徽院以前中書右丞相錫津為使丁丑封皇子克齊為雲南王賜駝鈕金鍍銀印壬午太白犯軒轅大星命克們征建都高麗國王王植遣其秘書監郭汝弼來賀聖誕節阿珠畧地至襄陽俘生口五萬馬牛五千宋人遣步騎來拒阿珠率騎兵敗之九月壬辰作玉殿于廣寒殿中乙未總師汪良臣請立寨於毋章德山控扼江南以當釣魚之衝從之戊申以許衡為國子祭酒安南國王陳

光晒遣使來貢優詔荅之立大理等處行六部以庫庫
岱為尚書兼雲南王傳柴禎尚書兼府尉寧源侍郎兼
司馬庚戌遣雲南王和克齊鎮大理鄯闡茶罕章赤禿
哥兒金齒等處詔撫諭吏民又詔諭安南國俾其君長
來朝子弟入質編民出軍役納賦稅置達魯噶齊統治
之癸丑申嚴西夏中興等路僧尼道士商稅酒醋之禁
車駕至自上都王鶚請立選舉法有旨令議舉行有司
難之事遂寢冬十月辛酉制國用司言布格濟山石絨

織為布火不能然詔採之壬戌賜駙馬布哈銀印魚通
崑州等處達嚕噶齊李福招諭西番諸族酋長以其民
入附以阿努班迪噶等為和隆武等處總管授璽書及
金銀符鐵旗城後番官官扎蘭遣其子達朗持先受憲
宗璽書金符乞改授新命從之甲子歲星犯軒轅大星
辛未太原進嘉禾二本異畝同穎甲戌賑新附民陳忠
等鈔丁丑制國用使司請量節經用從之庚辰定品官
子孫廕叙格十一月乙酉享于太廟戊戌立新蔡縣以

呼察李嘉努統所部兵戍之甲辰立夔府路總帥府戍
開州乙巳填星犯天鐫距星申嚴京畿畋獵之禁南京
宣慰劉整赴闕奏攻宋方畧宜先從事襄陽十二月甲
戌賞河南路統軍使諾海所部將士戰功銀九千六百
五十兩鈔幣鞍勒有差丙子賑親王伊遜克所部饑民
丁丑給遼東新僉軍布六萬匹己卯立遼東路水驛七
賞元帥阿珠部下有功將士二千二十五人銀五萬五
千三百兩金五十兩錦綵鞍勒有差庚辰僉女直碩達

勒達軍三千立諸位鄂拉克總管府省平陽路岳陽和
州二縣入冀氏復置霸州益津縣省安西路櫟陽縣入
臨潼是歲天下戶口一百六十四萬四千三十山東河
南北諸路蝗順天束鹿縣旱免其租斷死罪一百十四
人賜諸王金銀幣帛如歲例

五年春正月甲午太陰犯井庚子上都建城隍廟辛丑
勅陝西五路四川行省造戰艦五百艘付劉整高麗國
王王植遣其弟湍來朝詔以植飾辭見欺而數其事於

涓切責之復遣北京路總管約蘇圖及禮部郎中孟用
持詔往諭令具表遣海陽公金俊侍郎李藏用與去使
同來以聞庚戌賜高麗國新厯閏月戊午以陳毫潁蔡
等處屯田戶充軍令益都漏籍戶四千淘金登州栖霞
縣每戶輸金歲四錢二月戊子太陰犯天闕己丑太陰
犯井給河南山東貧乏軍士鈔戌戌改軍器局為軍器
監辛丑百戶溫都蘇駐營濟南路屬縣三年脅取民飲
食糧料當粟五千石勅杖決之仍償粟千石析甘州路

之肅州自為一路三月丙寅罷諸路四品以下子孫入
質者田禹妖言勅減死流之遠方禁民間兵器犯者驗
多寡定罪甲子敕克們率兵二千招諭建都壬申改母
章德山為定遠城武羣山為武勝軍丁丑敕阿里等詣
軍前閱視軍籍罷諸路女直契丹漢人為達嚕噶齊者
回回輝和爾奈曼唐古人仍舊夏四月壬寅遣使祀嶽
瀆五月辛亥朔以太醫院拱衛司教坊司尚食尚果尚
醞三局隸宣徽院癸亥都元帥伯嘉努拔宋嘉定五花

石城白馬三砦癸酉賜諸王和和及巴喇噶幣帛六萬
匹六月辛巳朔濟南王保和以妖言惑衆謀作亂勅誅
首惡五人餘勿論甲申中山大雨雹阿珠言所領者蒙
古軍遇山水砦柵非漢軍不可宜令史樞率漢軍協力
征進從之戊申東平等處蝗已酉封諸王寶竒特濟為
河平王賜駝鈕金印秋七月辛亥召翰林直學士高鳴
順州知州劉瑜中都郝謙李天輔韓彥文李祐赴上都
以山東統軍副使王仲仁戍眉州壬子詔陝西統軍司

兼領軍民錢穀罷各路鄂囉官令管民官兼領癸丑立御史臺以右丞相塔齊爾為御史大夫詔諭之曰臺官職在直言朕或有未當其極言無隱毋憚他人朕當爾主仍以詔諭天下立高州北二驛戊辰罷西夏宣撫司庚午省諸路打捕鷹坊工匠洞冶總管府令轉運司兼領之丙子立西夏惠民局高麗國王王植遣其臣崔東秀來言備兵一萬造船千隻詔遣都統領多托爾往閱之就相視黑山日本道路仍命耽羅別造船百艘以伺

調用詔四川行省賽音諤德齊自利州還京兆立東西
二川統軍司以劉整為都元師與都元帥阿珠同議軍
事整至軍中即建議築白河口鹿門山許之罷軍中諸
司參議八月乙酉程思彬以投匿名書言斥乘輿伏誅
己丑亳州大水庚子敕京師瀕河立十倉命孟古岱率
兵六千征西番建都九月癸丑中都路水免今年田租
罷中都路和顧所丁巳阿珠統兵圍樊城敕長春宮修
設金籙周天大蘸七晝夜建堯廟及后土太寧宮庚申

賜安南國王陳光昞錦繡及其諸臣有差已丑立河南
屯田命兵部侍郎赫德禮部侍郎殷弘齋國書復使日
本仍詔高麗國遣人導送期於必達毋致如前稽阻詔
諭安南國陳光昞來奏稱占城真臘二寇侵擾已命卿
調兵與布爾罕併力征討今復命雲南王和克齊統兵
南下可遵前詔遇有叛亂不庭為邊寇者發兵一同進
討降服者善為撫綏車駕至自上都益都路饑以米三
十一萬八千石賑之復以史天澤為樞密副使冬十月

戊寅朔日有食之己卯敕中書省樞密院凡有事與御史臺官同奏立河南等路行中書省以參知政事阿里行中書省事庚辰以御史中丞阿里為參知政事壬午詔恤沿邊諸軍其橫科差賦責鄂羅官償之庚寅敕從臣托果斯等錄毛詩孟子論語乙未享于太廟中書省臣言前代朝廷必有起居注故善政嘉謨不致遺失即以和爾果斯圖古勒充翰林待制兼起居注敕給黎雅嘉定新附民田戊戌宮城成劉秉忠辭領中書省事許

之為太保如故十一月己酉僉河南山東邊城附籍諸色戶充軍庚申宋兵自襄陽來攻沁山諸寨阿珠分諸軍禦之斬獲甚衆立功將士千三百四人詔首立戰功生擒敵軍者各賞銀五十兩其餘賞賚有差癸酉御史臺臣言立臺數月發擿甚多追理侵欺糧粟近二十萬石錢物稱是有詔褒諭免南京河南兩路來歲修築都城役夫十二月戊寅以中都濟南益都淄萊河間東平南京順天順德真定恩州高唐濟州北京等處大水免

今年田租敕二分二至及聖誕節日祭星于司天臺詔諭四川行省沿邊屯戍軍士逃役者處死復置乾州奉天縣省好時永壽入焉以鳳州隸興元路德興府改奉聖州隸宣德是歲京兆大旱天下戶一百六十五萬二百八十六斷死罪六十九人賜諸王金銀幣帛如歲例六年春正月癸丑高麗國王王禕遣使以誅權臣金俊來告賜厯日西錦立四道按察使戊午阿珠軍入宋境至復州德安府荊山等處俘萬人而還庚申以參知政

事楊果為懷孟路總管甲戌益都淄萊大水恩州饑命
賑之敕史天澤與樞密副使駙馬呼喇珠董師襄陽二
月壬午以立四道提刑按察司詔諭諸道己丑詔以新
製蒙古字頒行天下丙申罷宣德府稅課所以上都轉
運司兼領改河南懷孟順德三路稅課所為轉運司丁
酉僉民兵二萬赴襄陽賑謙州人匠貧乏者米五千九
百九十九石敕鞍靴箭鏃等物自今不得以黃金為飾
開元等路饑減戶賦布二疋秋稅減半碩達勒達戶減

青鼠二其租稅被災者免徵免單丁貧乏軍士一千九百餘戶為民癸卯給河南行省鈔千錠犒軍三月甲寅詔益都路僉軍萬人給鈔二十五貫戊午賑曹州饑築堡鹿門山夏四月辛巳製玉璽大小十紐甲午遣使祀岳瀆大名等路饑賑米十萬石五月丙午東平路饑賑米四萬一千三百餘石辛酉詔禁戍邊軍士牧踐屯田禾稼六月辛巳以招討克們征建都敗績又擅追索和爾璽書金符處死壬午免益都新僉軍單丁者千六

百二十一人為民丁亥河南河北山東諸郡蝗癸巳敕
真定等路旱蝗其代輸築城役夫戶賦悉免之丙申高
麗國王王植遣其世子堪來朝賜植玉帶一堪金五十
兩從官銀幣有差壬寅阿珠率兵萬五千人阮宋萬山
射梁岡鬼門關樵蘇之路癸卯詔董文炳等率兵二萬
二千人南征東昌路饑賑米二萬七千五百九十石秋
七月丁巳遣宋私商四十五人還其國庚申水軍千戶
邢德立張志等生擒宋荆鄂都統唐永堅賞銀幣有差

辛酉製太常寺祭服壬戌西京大雨雹己巳立諸路蒙古字學癸酉立國子學詔遣官審理諸路冤滯正犯死罪明白者各正典刑其雜犯死罪以下量斷遣之又詔諭宋國官吏軍民示以不欲用兵之意復遣都統領多托爾統領王昌國等往高麗點閱所備兵船及相視耽羅等處道路立西蜀四川監榷茶場使司宋將夏貴率兵船三千至鹿門山萬戶解汝楫李庭率舟師敗之俘殺二千餘人獲戰艦五十艘八月己卯立金州招討司

丙申以沙肅州鈔法未行降詔諭之詔諸路勸課農桑
命中書省采農桑事列為條目仍令提刑按察司與州
縣官相風土之所宜講究可否別頒行之高麗國世子
愷奏其國臣僚擅廢國王植立其弟安慶公曄詔遣鄂
爾多斯布哈李諤等往其國詳問條具以聞九月癸丑
恩州進嘉禾一莖三穗戊午敕民間貸錢取息雖踰限
止償一本息己未授高麗世子王愷特進上柱國東安
公壬戌豐州雲內東勝早免其租賦戊辰敕高麗世子

堪率兵三千赴其國難堪辭東安公乃授特進上柱國
辛未敕管軍萬戶宋仲義征高麗以呼喇珠史天澤並
平章政事阿里中書右丞行河南等路中書省事賽音
諤德齊行陝西五路西蜀四川中書省事車駕至自上
都鄂爾多斯布哈李諤以高麗刑部尚書金方慶至奉
渥表訴國王植邁疾令弟渥權國事冬十月己卯定朝
儀服色壬午陞高唐冠氏並為州丁亥廣平路旱免租
賦詔遣兵部侍郎赫德溜萊路總管府判官徐世雄召

高麗國王王直王弟淐及權臣林衍俱赴闕命國王特
訥克以兵壓其境趙壁行中書省于東京仍降詔諭高
麗國軍民庚子太陰犯辰星宋遣人餽鹽糧入襄陽我
軍獲之賜諸王鄂囉齊駝鈕金鍍銀印十一月癸卯高
麗都統領崔坦等以林衍作亂挈西京五十餘城來附
丁未僉王縛洪察球爾軍三千往定高麗高麗西京都
統李延齡乞益兵遣孟格圖率兵二千赴之庚午敕諸
路鰥寡廢疾之人月給米二斗安南國王陳光昞遣使

來貢濟南饑以米十二萬八千九百石賑之高麗國王
王植遣其尚書禮部侍郎朴休從赫德入朝表稱受詔
已復位尋當入覲築新城于漢江西十二月戊子築東
安渾河堤己丑作佛事于太廟七晝夜高唐固安二州
饑以米二萬六百石賑之析彰德懷孟衛輝為三路陞
林慮縣為林州改楨州復為韓城縣併省馮翊等州縣
十所以懿州廣寧等府隸東京是歲天下戶一百六十
八萬四千一百五十七賜諸王金銀幣帛如歲例斷死

罪四十二人

宋史卷六

元史卷六考證

二年六月戊辰朔

原作戊申據前丁卯後辛未考之

當是戊辰今改正

王晉罷

罷原文譌置按本年二月載山東廉訪使王

晉為參知正事蓋至是罷去云今改正

三年伊蘇岱爾等僉行中書省事 原文作也速帶兒

他卷又作也速答兒也速達兒也速迭兒也速台兒

今併改

四年城中都 原文作大都按地理志云燕京至元元年改中都四年始於中都之東北置今城而遷都焉九年改大都此時尚未有大都之稱即志所云於中都之東北置今城者是也觀下文三月勅中都句可見今據改

賜皇子燕王珍戩莽噶拉諾摩罕和克齊銀三萬兩

按燕王史原文遺其名既非通例莽噶拉為安西王與燕王連屬文義亦牽混今據表增和克齊原文作

忽哥赤他卷又作愛哥赤今併改

五年三月丙寅 甲子 按干支中間相距五十餘日
舛誤顯然他書無可訂正仍闕疑下文九月癸丑日
丑同

六年賑謙州人匠貧乏者 謙州原文作欠州按地理
志載謙州因謙河得名去大都九千里居民數千家
悉蒙古回紇人有工匠數局國初所徙漢人也史所
云工匠貧乏者正指此當是謙欠音近而訛今據十

改後做此

欽定四庫全書

元史卷七

明翰林學士亞中大夫知制誥兼修國史宋濂等修

本紀第七

世祖四

七年春正月辛丑朔高麗王王植遣使來賀丙午耶律
鑄廉希憲罷立尚書省罷制國用使司以平章政事呼
圖克岱爾為中書左丞相祭酒許衡為中書左丞相制國

用使阿哈瑪特平章尚書省事同知制國用使司事張
易同平章尚書省事制國用使司副使張惠簽制國用
使司事李堯咨敏珠爾丹並參知尚書省事己酉大陰
犯畢敕諸投下官隸中書省壬子敕驛券無印者不許
乘傳甲寅高麗國王王植遣使來言比奉詔臣已復位
今從七百人入覲詔令從四百人來餘留之西京詔高
麗西京內屬改東寧府畫慈悲嶺為界丁巳以莽格為
安撫高麗使佩虎符率兵戍其西境戊午均房州總管

孫嗣擒宋統制朱興祖等丙寅賑烏嚕古民戶鈔丁卯
定省院臺文移體式二月辛未朔以前中書右丞相巴
延為樞密副使甲戌築招應宮于高梁河丙子帝御行
宮觀劉秉忠博囉許衡及太常卿徐世隆所起朝儀大
悅舉酒賜之丁丑以歲饑罷修築官城役夫甲申置尚
書省署乙酉立紙甲局申嚴畜牧損壞禾稼桑果之禁
壬辰立司農司以參知政事張文謙為卿設四道巡行
勸農司乙未宋襄陽出步騎萬餘人兵船百餘艘來趣

萬山堡萬戶張弘範千戶托克托擊敗之事聞賜金紋綾有差高麗王王植來朝求見皇子燕王詔曰汝一國主也見朕足矣植請以子懋見從之詔諭植曰汝內附在後故班諸王下我太祖時伊呼先附即令齒諸王上阿爾斯蘭後附故班其下卿宜知之又詔令國王特訥克等舉軍入高麗舊京以托克托岱爾焦天翼為其國達魯噶齊護送植還國仍下詔林衍廢立罪不可赦安慶公渴本非得已在所寬宥有能執送衍者雖舊在其

黨亦必重增官秩世子懼奏乞隨朝及尚主不許命隨其父還國三月庚子朔日有食之改河南等路及陝西五路西蜀四川東京等路行中書省為行尚書省尚書省臣言河西和羅應僧人豪官富民一例行之制可甲寅車駕幸上都丙辰浚武縣御河丁巳定醫官品從戊午益都登萊蝗旱詔減其今年包銀之半阿珠與劉整言圍守襄陽必當以教水軍造戰艦為先務詔許之教水軍七萬餘人造戰艦五千艘夏四月壬午檀州隕黑

霜三夕設諸路蒙古字學教授敕諸路達魯噶齊子弟
陰叙充散府諸州達魯噶齊其散府諸州子弟充諸縣
達魯噶齊諸縣子弟充巡檢改御史臺典事為都事癸
未定軍官等級萬戶總管千戶百戶總把以軍士為差
己丑省終南縣入藍屋復真定贊皇縣太原樂平縣高
麗行省遣使來言權臣林衍死其子惟茂擅襲令公位
為尚書宋宗禮所殺島中民皆出降已遷之舊京衍黨
裴仲孫等復集餘衆立植庶族承化侯為王竄入珍島

五月辛丑懷州河內縣大雨雹癸卯陝西簽省伊蘇岱
爾嚴忠範與東西川統軍司率兵及宋兵戰于嘉定重
慶釣魚山馬湖江皆敗之拔三寨擒都統牛宣俘獲人
民及馬牛戰艦無算甲辰威州汝鳳川蕃族八千戶內
附其酋長來朝授宣命賜金符丁未東京路饑兼運糧
造船勞役免今年絲銀十之三以同知樞密院事哈達
為平章政事乙卯復平灤路撫寧縣以海山昌黎入之
丙辰括天下戶尚書省臣言諸路課程歲銀五萬鉅恐

疲民力宜減十分之一運司官吏俸祿宜與民官同其
院務官量給工食仍禁所司多取於民歲終較其增損
而加黜陟上都地里遙遠商旅往來不易特免收稅以
優之惟市易莊宅奴婢尊畜例收契本工墨之費管民
官遷轉以三十月為一考數於變易人心苟且自今請
以六十月遷轉諸王遣使取索諸物及鋪馬等事目今
並以文移毋得口傳教令並從之改宣徽院為光祿司
秩正三品以宣徽使錫津為光祿使庚申命樞密院閱

實軍數壬戌東平府進瑞參一莖二穗三穗五穗者各
一本省中都打捕鷹坊總管府入工部大名東平等路
桑蠶皆災南京河南等路蝗減今年絲銀十之三六月
丙子敕西夏中興市馬五百匹庚辰敕戍軍還有乏食
及病者令所過州城村坊主者給飲食醫藥丁亥罷各
路洞冶總管府以轉運司兼領徙謙州甲匠于松山給
牛具賜皇子諾木罕馬六千牛三千羊一萬賜北邊戍
軍馬二萬牛一千羊五萬丙申立籍田中都東南郊禁

民入宋境剽掠秋七月辛丑設上林署乙卯賜諸王巴爾達噶印及海青金符二庚申初給軍官俸壬戌簽諸道回回軍乙丑閱實諸路斂手戶都元帥伊蘇岱爾等畧地光州敗宋兵于金剛臺以遼東開元等路總管府兼本路轉運司事山東諸路旱蝗免軍戶田租戍邊者給糧命達噶齊烏蘭濟達給上都扈從畋獵糧八月戊辰朔築環城以逼襄陽己巳賑應昌府饑諸王巴爾達噶部曲告饑命有車馬者徙居鴻和爾鄂隆地計口

給糧無車馬者就食肅沙甘州戊寅隆興府總管實喇
諤都以盜用官錢罷庚辰以御史大夫塔齊爾同知樞
密院事御史中丞特濟為御史大夫高麗世子王愷來
賀聖誕節辛巳設應昌府官吏辛卯保定路霖雨傷禾
稼九月庚子敕僧道伊囉勒昆有家室不持戒律者占
籍為民丁巳太陰犯井丙寅括河西戶口定田稅宋將
范文虎以兵船二千艘夾援襄陽阿珠哈達劉整率兵
逆戰于灌子灘殺掠千餘人獲船三十艘文虎引退西

京饑敕諸王阿濟格所部就食太原山東饑敕益都濟南酒稅以十之二收糧冬十月戊辰朔敕兩省以已奏事報御史臺庚午太白犯右執法癸酉敕宗廟祭祀祝文書以國字乙亥宋人攻莒州乙酉享于太廟丁亥以南京河南兩路旱蝗減今年差賦十之六發清滄鹽二十四萬斤轉南京米十萬石並給襄陽軍已丑敕來年太廟牲牢勿用豢豕以野豕代之時果勿市取之內園車駕至自上都降興中府為州賑山東淄萊路饑十一

月壬寅熒惑犯太微西垣上將壬子河西諸郡諸王頓
舍僧民協力供給丁巳敕益兵二千合前所發軍為六
千屯田高麗以實都及前左壁總帥史樞並為高麗金
州等處經畧使佩虎符領屯田事仍詔諭高麗國王立
侍儀司安南國王陳光昞遣使來貢優詔荅之復賑淄
萊路饑閏月丁卯朔高麗世子王愷還賜王植至元八
年厯戊辰禁繒段織日月龍虎及以龍犀飾馬鞍者已
已給河西行省鈔萬錠以充歲費以義州隸博索府癸

未詔諭西夏提刑按察司管民官禁僧徒冒據民田壬辰申明勸課農桑賞罰法詔設諸路托克托和斯十二月丙申朔改司農司為大司農司添設巡行勸農使副各四員以御史中丞博囉兼大司農卿安圖言博囉以臺臣兼領前無此例有旨司農非細事朕深諭此其令博囉總之命陝西等路宣撫使趙良弼為祕書監充國信使使日本敕歲祀太社太稷風師雨師雷師戊戌徙懷孟新民千八百餘戶居河西壬寅陞御史大夫秩正

二品降河南韶州為澠池縣宋重慶制置朱禔孫遣謀者持書榜來誘安撫張大悅等大悅不發封併謀者送致東川統軍司丁未金齒驃國三部酋長阿匿福勒丁阿匿爪來內附獻馴象三馬十九疋己酉魚通路知府高伊實獲宋謀者詔賞之辛酉以都水監隸大司農司以諸王博和哩為扎爾古齊之長建大護國仁王寺于高良河敕更定僧服色是歲天下戶一百九十二萬九千四百四十九賜先朝后妃及諸王金銀幣帛如歲例

斷死刑四十四人

八年春正月乙丑朔高麗國王王植遣其秘書監朴桓
郎將崔有滄來賀兼奉歲貢丙寅太陰犯畢己卯以同
僉河南等路行中書省事阿爾哈雅參知尚書省事中
書省臣言前有旨令臣與樞密院御史臺議河南行省
阿里布等所置南陽等處屯田臣等以為凡屯田人戶
皆內地中產之民遠徙失業宜還之本籍其南京南陽
歸德等民賦自今悉折輸米糧貯于便近地以給襄陽

軍食前所屯田阿里布自以無效引伏宜令州郡募民
耕田從之史天澤告老不允敕前築都城徙居民三百
八十二戶計直償之設樞密院斷事官遣諤都瑪勒率
蒙古軍鎮西方當當丙戌高麗安撫阿哈畧地珍島與
逆黨過多所亡失中書省臣言謀知珍島餘糧將竭宜
乘弱攻之詔不許令巡視險要常為之備丁亥管如仁
費正寅以國機事為書謀遣崔繼春賈靠山路坤入宋
事覺窮治正寅如仁繼春皆正典刑靠山坤並流遠方

壬辰敕諸路鰥寡孤獨疾病不能自存者官給廬舍薪
米高麗國王王植遣使奉表為世子懃請昏詔禁邊將
受路放軍及科歛賑北京益都饑二月乙未朔定民間
婚聘禮幣貴賤有差丁酉發中都真定順天河間平灤
民二萬八千餘人築宮城己亥罷諸路轉運司入總管
府以尚書省奏定條畫頒天下移陝蜀行中書省于興
元癸卯四川行省伊蘇岱爾言比因饑饉盜賊滋多宜
加顯戮詔令羣臣議安圖以為強竊盜賊一皆處死恐非

所宜罪至死者仍舊待命以中書左丞東京等路行尚書省事趙璧為中書右丞甲辰添設監察御史六員命呼圖克岱爾持詔招諭高麗林衍餘黨裴仲孫乙巳大理等處宣慰都元帥實赫鼎王傳庫庫岱等協謀毒殺雲南王和尼齊曹楨發其事實赫鼎庫庫岱及阿喇卜丹伊寶布並伏誅賞楨和尼齊及證左人金銀有差以沙州瓜州鷹坊三百人充軍戊申詔以治事日程諭中外官吏敕往輝和爾地市米萬石庚戌申嚴東州井鹽

之禁已未敕軍官佩金銀符其民官工匠所佩者並拘
入勿復給敕海青符用太祖皇帝御署庚申奉御玖珠
舊以梳櫛奉太祖奉所落鬚髮束上詔櫛之藏于太廟
夾室辛酉敕凡訟而自匿及誣告人罪者以其罪罪之
分歸德為散府割宿亳邳徐等州隸之升申州為南陽
府割唐鄧裕嵩汝等隸之賑西京饑三月乙丑增治河
東山西道按察司改河東陝西道為陝西四川道山北
東西道為山北遼東道甲戌敕元正聖節朝會凡百官

表章外國進獻使臣陞見朝辭禮儀皆隸侍儀司丙子
改山東河間陝西三路鹽課都轉運司為都轉運鹽使
司己卯中書省臣言高麗叛臣裴仲孫乞諸軍退屯然
後內附而實都未從其請今願得全羅道以居直隸朝
廷詔以其飾詞遷延歲月不允辛巳復立夏邑縣以碭
山入馬省穀熟入睢陽濱棣萬戶韓世安坐私儲糧食
燒毀軍器詐乘驛馬及擅請諸王塔齊爾益都四縣分
地等事有司屢以為言詔誅之仍籍其家甲申車駕幸

上都乙酉許衡以老疾辭中書機務除集賢大學士國
子祭酒衡納還舊俸詔別以新俸給之命設國子學增
置司業博士助教各一員選隨朝百官近侍蒙古漢人
子孫及俊秀者充生徒丁亥熒惑犯太微西垣上將已
丑立西夏中興等路行尚書省以青哈參知行尚書省
事命尚書省閱實天下戶口頒條畫諭天下賑益都等
路饑敕有司毋留獄滯訟以致越訴違者官民皆罪之
制封皇子燕王乳母趙氏幽國夫人夫鞏德祿追封德

育公夏四月壬寅高麗鳳州經畧司實都言叛臣裴仲
孫稽留使命負固不服乞與浩爾齊王國昌分道進討
從之平灤路昌黎縣民生子中夜有光詔加鞠養或以
為非宜帝曰何幸生一好人母生嫉心也命高麗簽軍
征珍島癸卯給河南行中書省歲用銀五十萬兩仍敕
襄樊軍士自令人月給米四斗甲辰簽壯丁備宋戊午
阿珠率萬戶阿嚙罕等與宋將范文虎等戰于湍灘敗
之獲統制朱勝等百餘人奪其軍器賞阿珠阿嚙罕等

金帛有差以至元七年諸路災蠲今歲絲料輕重有差
五月乙丑以東道兵圍守襄陽命賽音諤德齊鄭鼎水
陸並進趨嘉定汪良臣彭天祥出重慶扎拉布哈出瀘
州奇爾濟蘇出汝州牽制之改簽省伊蘇岱爾鄭鼎軍
前行尚書事賽音諤德齊行省事于興元轉給軍糧丙
寅牢魚國來貢己巳脩佛事于瓊華島辛未分大理國
三十七部為三路以大理八部蠻酋新附降詔撫諭壬
申造內外儀仗丁丑賑蔚州饑己卯命史天澤平章軍

國重事陞太府監為正三品實都史樞表言珍島賊徒
敗散餘黨竄入耽羅辛巳賜河西行省金符銀海青符
各一令蒙古官子弟好學者兼習算術癸未升濟州為
濟寧府以王宸院隸宣徽院高麗國王王植遣使貢方
物六月甲午敕樞密院凡軍事徑奏不必經由尚書省
其于錢糧者議之上都中都河間濟南淄萊真定衛輝
洛磁順德大名河南南京彰德益都順天懷孟平陽歸
德諸州縣蝗癸卯宋將范文虎率蘇劉義夏松等舟師

十萬援襄陽阿珠率諸將迎擊奪其戰船百餘艘敵敗走平章哈達又遣萬戶解汝揖等邀擊擒其總管朱日新鄭皋大破之辛亥敕管民官所領錢穀公事並俟年終考較乙卯招集河西鄂端阿濟爾噶等處居民已未山東統軍司達春董文炳偵知宋人欲據五河口請築城守之既而坐失事機宋兵已樹柵其地事聞敕決罰達春文炳等有差遼州和順縣解州聞喜縣好蚡生秋七月壬戌朔尚書省請增太原鹽課歲以鈔千錠為額

仍令本路兼領從之設回回司天臺官屬以扎瑪里鼎
為提點簽女直碩達勒達軍以鄭元領祠祭岳瀆授司
裡大夫丁卯南人李忠進言運山侍郎張大悅與宋交
通以其事無實詔諭大悅宋善用間朕不輕信毋懷疑
懼以國王特訥克行尚書省于北京遼東等路辛未置
左右中三衛親軍都指揮使司乙亥肇昌臨洮平涼府
會蘭等州隕霜殺禾乙酉宋將來興國攻百丈山營阿
珠擊破之追至湍灘斬首二千餘級高麗世子王堪入

質珍島脅從民戶來降八月壬辰朔日有食之癸巳敕
軍站戶地四頃以上依例輸租己亥詔招諭宋襄陽守
臣呂文煥壬子車駕至自上都遷成都統軍司於眉州
己未聖誕節初立內外仗及雲和署樂位東川統兵司
引兵攻宋銅鉞寨守寨總管李慶等降以慶知梁山軍
事九月壬戌朔敕都元帥阿珠以所部兵畧地漢南癸
亥高麗世子王懌辭歸賜國王王植西錦優詔諭之甲
子賜劉整鈔五百錠鄧州田五百頃整辭改賜民田三

百戶科調如故給河南行省歲用鈔二萬八千六百錠
丙寅罷陝西五路西蜀四川行尚書省以伊蘇岱爾行
四川尚書省事于興元京兆等路直隸尚書省敗宋軍
于渦河戊辰陞成都府德陽縣為德州降號州為號畧
縣壬申選胄子托克托移爾等十人肄業國學癸酉益
都府濟州進芝二本甲戌簽西夏回回軍太廟殿柱壞
監察御史劾都水劉最監造不敬最以憂卒張易請先
期告廟然後完葺從之丙子敕令歲享太廟毋用犧牛

太陰犯畢庚辰右衛親軍都指揮使呼圖克等言五河
城堡成唯廬舍未完凡材斃皆出宋境請率精兵分道
抄掠從之壬午山東路統軍司言宋兵攻膠州千戶蔣
德等逆戰敗之俘統制范廣等五十餘人獲戰船百艘
癸未詔明安倉失陷米五千餘石特免徵仍禁諸王非
理需索詔以四川民力困弊免茶鹽等課稅以軍民田
租給沿邊軍食敕有司有再言茶鹽之利者以違制論
冬十月癸巳大司農臣言高唐州達魯噶齊呼圖克鼎

爾州尹張廷瑞同知陳思濟勸課有效河南府陝縣尹
王仔急於勸課宜加黜陟以示勸懲從之丁酉享于太
廟己未檀順等州風潦害稼賜高麗至元九年歷十一
月辛酉朔敕品官子孫保直敕遣阿勒達爾等撫治大
理壬戌罷諸路交鈔都提舉司乙亥劉秉忠王磐圖克
坦公履等言元正朝會聖節詔赦及百官宣敕具公服
迎拜行禮從之禁行金泰和律建國號曰大元詔曰誕
膺景命奄四海以宅尊必有美名紹百王而紀統肇從

隆古匪獨我家且唐之為言蕩也堯以之而著稱虞之
為言樂也舜因之而作號馴至禹興而湯造互名夏大
以殷中世降以還事殊非古雖乘時而有國不以利而
制稱為秦為漢者著從初起之地名曰隋曰唐者因即
所封之爵邑是皆徇百姓見聞之狃習要一時經制之
權宜槩以至公不無少貶我太祖聖武皇帝握乾符而
起朔土以神武而膺帝圖四震天聲大恢王宇輿圖之
廣歷古所無頃者耆宿詣庭奏草申請謂既成於大業

宜早定於鴻名在古制以當然於朕心乎何有可建國
號曰大元蓋取易經乾元之義茲大治流形于庶品孰
名資始之功予一人底寧于萬邦尤切體仁之要事從
因革道協天人於戲稱義而名固匪為之溢美乎休惟
永尚不負于投艱嘉與敷天共隆大號丙戌置四川行
省於成都上都萬安閣成十二月辛卯朔詔天下興國
字學宣徽院請以闡遺漏籍等戶淘金帝曰姑止毋重
勞吾民也乙巳減百官俸括西夏田召達春董文炳赴

闕辛亥併太常寺入翰林院宮殿府入少府監甲寅遷
尚書省入中書省是歲天下戶一百九十四萬六千二
百七十賜先朝后妃及諸王金銀幣帛如歲例賜囊嘉
特等羊馬價鈔萬千一百六十七錠斷死罪一百五人
九年春正月庚申朔高麗王王植遣其臣禮賓卿宣文
烈來賀兼奉歲貢甲子併尚書省入中書省平章尚書
省事阿哈瑪特同平章尚書省事張易並中書平章政
事參知尚書省事張惠為中書左丞參知尚書省事李

堯咨敏珠爾丹並參知中書政事罷給事中中書舍人
檢正等官仍設左右司省六部為四改稱中書丙寅遣
布哈及馬璘諭高麗具舟糧助征耽羅河南省請益兵
敕諸路簽軍三萬丁丑敕皇子西平王鄂囉齊阿魯特
穆爾圖格及南平王圖魯所部與四川行省伊蘇岱爾
部下并孟古岱等十八族約蘇格隆等土番軍同征建
都新安州初隸雄州詔為縣入順天庚辰改北京中興
四川河南四路行尚書省為行中書省京兆復立行省

仍命諸王哲伯特穆爾設省斷事官給西平王鄂囉齊馬價弓矢賜南平王圖魯銀印及金銀符各五辛巳移鳳州屯田於鹽白二州敕董文炳時巡掠南境毋令宋人得立城堡敕軍民訟田者民田有餘則分之軍軍田有餘亦分之民仍遣能臣聽其直其軍奴入民籍者還正之敕燕王遣使持香旛祀岳瀆后土五臺興國寺命劉整總漢軍壬午改山東東路都元帥府統軍司為行樞密院以伊蘇岱爾達春並為行樞密院副使乙酉定

受宣敕官禮儀詔元帥府統軍司總管萬戶府開寶軍籍二月庚寅朔奉使日本趙良弼遣書狀官張鐸同日本二十六人至京師求見辛卯詔扎爾古齊乃太祖開創之始所置位百司右其賜銀印立左右司壬辰高麗國王王植遣其臣齊安侯王淑來賀改國號改中都為大都甲午命阿珠典蒙古軍劉整阿爾哈雅典漢軍戊戌以去歲東平及西京等州縣旱蝗水潦免其租賦庚子復唐州泌陽縣建中書省署於大都戊申始祭先農

如祭社之儀詔諸路開浚水利車駕幸上都三月乙丑
諭旨中書省日本使人遠議遣還安圖言良弼請移金
州戍兵勿使日本妄生疑懼臣等以為金州戍兵彼國
所知若復移戍恐非所宜但開諭來使此戍乃為耽羅
暫設爾等不須疑畏也帝稱善甲戌括民間四教經焚
之蒙古都元帥阿珠漢軍都元帥劉整阿爾哈雅督本
軍破樊城外邪斬首二千級生擒將領十六人增築重
圍守之賑濟南路饑詔免醫戶差徭夏四月己丑詔於

土番西川界立寧河驛辛卯賜皇子阿雅噶齊所部馬
給西平王鄂囉齊所部米甲寅賑大都路饑五月戊午
朔立和琳轉運司以蘇爾約蘇貝為使兼提舉交鈔使
己未給庫庫楚海青銀符二辛酉罷簽回回軍癸亥敕
巴圖軍於齊噶納之地開渠耕田丙寅簽徐邳二州丁
壯萬人戌邳州庚午減鐵冶戶罷西番多羅于等處金
銀礦戶為民禁漢人聚衆與蒙古人鬪毆詔議取耽羅
及濟州辛巳敕修築都城凡費悉從官給毋取諸民并

蠲伐木役夫稅賦甲申敕諸路軍戶驅丁除至元七年
前從良入民籍者當差餘雖從良並令助本戶軍力乙
酉太白犯畢距星宮城初建東西華左右掖門詔安集
達勒巴所部流民六月壬辰遣高麗國西京屬城諸達
嚕噶齊及質子金鎰等歸國減奇爾濟蘇屯田所入租
仍遣南人百名給牛具以往是夜京師大雨壞牆屋壓
死者衆癸巳敕以籍田所儲糧賑民不足又發近地官
倉濟之甲午高麗告饑轉東京米二萬石賑之己亥山

東路行樞密院達春於四月十三日遣步騎趨連州攻破射龍溝五港口鹽場白頭河四處城堡殺宋兵三百餘人虜獲人牛萬計第功賞賚有差辛亥高麗國王王植請討耽羅餘寇秋七月丁巳朔河南省臣言往歲徙民實邊屯耕以負苦悉散還家今唐鄧蔡息徐邳之民愛其田廬仍守故屯願以絲銀準折輸糧而內地州縣轉粟餉軍者反厭苦之臣議今歲沿邊州郡宜仍其舊輸糧內地州郡驗其戶數俾折鈔就沿邊和糴庶幾彼

此交便制可拘括開元東京等路諸漏籍戶禁私鬻回
回歷賑碩達勒達部饑戊寅賜諸王已拜部銀鈔築都
城僧誦大藏經九會壬午和爾果斯奏蒙古字設國子
學而漢官子弟未有學者官府文移猶有輝和爾字詔
自今凡詔令並以蒙古字行仍遣百官子弟入學乙酉
免徙大羅鎮居民令倍輸租米給鷹坊詔分閱大都京
兆等處特默齋奴戶名籍八月丙戌朔日有食之戊子
立羣牧所掌牧馬及尚方鞍勒壬辰敕明安倉及靖州

預儲糧五萬石以備鴻吉哩新徙部民及西人內附者
廩給調兵增戍全羅州乙未禁諸人以已事輒呼至尊
稱號丁酉立鄂拓克所已亥諸王庫庫楚請以分地寧
海登萊三州自為一路與他王比歲賦惟入寧海無輸
益都詔從之癸卯千戶崔松敗宋襄陽援兵斬其將張
順賜松等將士有差乙巳車駕至自上都丁未改延州
為延津縣與陽武同隸南京癸丑賑遼東等路饑九月
甲子宋襄陽將張貴以輪船出城順流突戰阿珠阿爾

哈雅等舉烽燃火燭江如晝率舟師轉戰五十餘里至
櫃門關生獲貴及將士二千餘人丙寅敕樞密院諸路
正軍貼戶及同籍親戚奴僕丁年既長依諸王權要以
避役者並還之軍惟匠藝精巧者以名聞癸酉同簽河
南省事崔斌訟右丞阿里妄奏軍數二萬敕杖而罷之
甲戌罷水軍總管府東川元帥李吉等畧地開州拔石
羊寨擒宋將一人統軍使哈喇等兵掠合州及渠江口
獲戰船五十艘賞銀幣有差丙子發民夫三千人伐巨

木遼東免其家徭賦戊寅太陰犯御女賑益都路饑冬
十月丙戌朔封皇子莽噶拉木為安西王賜京兆為分
地駐兵六盤山遣使詔諭巴勒布痕都斯坦國壬辰享
于太廟癸巳趙璧為平章政事張易為樞密副使乙未
築澤河堤戊戌熒惑犯填星定制自七月至十一月終
聽捕獵餘月禁之癸卯立文州初立會同館十一月乙
卯朔賜高麗至元十年厯壬戌發北京民夫六千伐木
乾山蠲其家徭賦諸王哲伯特穆爾築新城成賜名永

昌府丙寅蠲實喇譯都所負官錢丁卯太陰犯畢城光
州遣無籍軍掠宋境己巳敕發屯田軍二千漢軍二千
高麗軍六千仍益武衛軍二千征耽羅辛未召高陸儒
者楊恭懿不至癸酉以前拔樊城外邪功賞千戶劉深
等金銀符己卯併中書省左右司為一宋荆湖制置李
庭芝為書遣永寧僧齋金印牙符來授劉整廬龍軍節
度使封燕郡王僧至永寧事覺上聞敕張易姚樞雜問
適整至自軍中言宋患臣用兵襄陽欲以是殺臣臣實

不知敕令整為書復之賞整使還軍中誅永寧僧及其
黨友參知行省政事阿爾哈雅言襄陽受圍久未下宜
先攻樊城斷其聲援從之回回伊斯瑪音創作巨石砲
來獻用力省而所擊甚速命送襄陽軍前用之十二月
乙酉朔詔諸路府州司縣達魯噶齊管民長官兼管諸
軍鄂囉丁亥立肅州等處驛以東平府民五萬餘戶復
為東平路辛丑諸王呼喇珠拘括逃民高麗界中高麗
達魯噶齊上其事詔高麗之民猶未安集禁罷之遣宋

議互市使者南歸戊午賜北安王諾木罕軍馬一萬二千九百九十一羊六萬一千五百三十一及諸王塔齊爾軍幣帛辛亥宋將咎萬壽來攻成都簽省嚴忠範出戰失利退保子城同知王世英等八人棄城遁詔以邊城失守罪在主將世英雖遁與免其罪惟遣使縛忠範至京師癸丑陞拱衛司為拱衛直都指揮使司是歲天下戶一百九十五萬五千八百八十賜先朝后妃及諸王金銀幣帛如歲例斷死罪三十九人建大聖壽萬安

寺



元史卷七

元史卷七考證

七年立籍田中都東南郊 原文謚大都說見前卷六

考證

八年率蒙古軍鎮西方當當 按當當地理志不載考

之方輿紀要及歷代地理志書亦無此名惟後漢書
有燒當羌宋史有當煎羌或即此沿襲之訛但未可
臆改仍闕疑

毒殺雲南王和尼齊 按和尼齊原名忽哥赤詳見前

此又訛作火你赤考火你赤為元官名亦作火而赤
今改和尼齊雲南王被毒事具張立道傳發其奸者
御史大夫博囉罕等曹楨不過一告變人耳後乃以
和尼齊官賞之下文可證今依忽哥赤譯改

置四川行省於成都 原文脫行字據地理志增

九年千戶崔松敗宋襄陽援兵斬其將張順 按櫃門
之戰宋將張順張貴慷慨請行順被創死越數日其
尸溯江而上甲冑如生貴則入城冒圍突出為何珠

所擒蓋一事也且其戰在五月乘漢水方生輕舸突
進續通鑑所載甚詳宋史亦同史所紀互異

十二月乙酉朔 戊午 按干支訛舛無可訂正仍闕
疑

欽定四庫全書

史部
元史卷八至
十

御史_臣徐如澍覆勘

總校官編修_臣朱鈐

欽定四庫全書

元史卷八

明翰林學士亞中大夫知制誥兼修國史宋濂等修

本紀第八

世祖五

十年春正月乙卯朔高麗國王王植遣世子湛來朝戊
午敕自今並以國字書宣命命實都鄭溫洪察球爾征
耽羅宿州萬戶阿實克布哈請築堡牛頭山扼兩淮糧

運不允阿實克布哈言前宋人城五河統軍司臣皆當得罪今不築恐為宋人所先帝曰汝言雖是若坐視宋人戍之罪亦不免也安南使者還言陳光昞受詔不拜中書移文責問光昞稱從本俗改回回阿錫頁所立京師醫藥院名廣惠司己未禁鷹坊擾民及陰陽圖讖等書癸亥阿爾哈雅等攻樊城拔之守將呂文煥懼而請降中書省驛聞遣前所俘唐永堅持詔諭之丁卯立秘書監戊辰給皇子北平王甲一千置軍器永盈二庫分

典弓矢甲冑庚午簽陝西特默齊軍已邠川蜀省言宋
咎萬壽攻成都伊遜岱爾所部騎兵征建都未還擬於
京北等路簽新軍六千為援從之詔遣察楚克雅善罕
崔杓持金十萬兩命諸王阿布哈市藥獅子國壬午賞
東川統軍哈喇所部有功者哈喇請於渠江之北雲門
山及嘉陵西岸虎頭山立二戍以其圖來上仍乞益兵
二萬詔給京北新簽軍五千益之二月丙戌以皇后皇
太子受冊寶遣太常卿哈坦告太廟丙申雲南羅羽酋

長阿旭叛詔有司安集其民募能捕斬阿旭者賞之遣
斷事官穆蘇勾校川陝行省錢穀詔噶瑪拉實哩奇爾
岱托音劉源使緬國諭遣子弟近臣來朝高麗國王王
植以王師征耽羅乞下令禁俘掠聽自製兵仗從之丁
未宋京西安撫使知襄陽府呂文煥以城降三月甲寅
朔詔申諭大司農司遣使巡行勸課務要農事有成乙
丑敕樞密院以襄陽呂文煥率將吏赴闕熟券軍并城
居之民仍居襄陽給其田牛生券軍分隸各萬戶翼文

煥等發襄陽擇蒙古漢人有才力者護視以來丙寅帝
御廣寒殿遣攝太尉中書右丞相安圖授皇后鴻吉哩
氏玉冊玉寶遣攝太尉同知樞密院事巴延授皇太子
珍戩玉冊金寶辛未以皇后皇太子受冊寶詔告天下
劉整請教練水軍五六萬及於興元金洋州汴梁等處
造船二千艘從之壬申分金齒國為兩路癸酉客星青
白如粉絮起畢度五車北復自文昌貫斗杓歷梗河至
左攝提凡二十一日以前中書左丞相耶律鑄平章軍

國重事中書左丞張惠為中書右丞車駕幸上都西蜀
嚴忠範以罪罷遣察克布哈等撫治軍民罷中興等處
行中書省夏四月癸未朔阿爾哈雅以呂文煥入朝授
文煥昭勇大將軍侍衛親軍都指揮使襄漢大都督賜
其將校有差時將相大臣皆以南伐為請驛召姚樞許
衡圖克坦公履等問計公履對曰乘破竹之勢席卷三
吳此其時矣帝然之詔罷河南等路行中書省以平章
軍國重事史天澤平章政事阿珠叅知政事阿爾哈雅

行荆湖等路樞密院事鎮襄陽左丞相哈坦叅知行中
書省事劉整山東都元帥達春董文炳行淮西等路樞
密院事守正陽天澤等陞辭詔諭以襄陽之南多有堡
寨可乘機進取仍以鈔五千錠賜將士及賑新附軍民
甲申免隆興路權課三年丁酉敕南儒為人掠賣者官
贖為民辛丑罷四川行省以鞏昌二十四處便宜總帥
汪良臣行西川樞密院東川閬蓬廣安順慶夔府利州
等路統軍使哈喇行東川樞密院東川副統軍王仲仁

同簽行樞密院事仍令汪良臣就率所部軍以往五月
壬子朔定内外官復舊制三歲一遷甲寅禁無籍軍從
大軍殺掠其願為軍者聽戊辰詔天下獄囚除殺人者
待報其餘一槩疎放限以八月內自至大都如期而至
者皆赦之乙亥詔免民代輸簽軍戶絲銀及伐木夫戶
賦稅負前朝官錢不能償者毋徵主守失陷官錢者杖
而釋之陣亡軍及營繕工匠無丁產者量加廩給以雄
易州復隸大都庚辰賞襄陽有功萬戶鄂囉齊等銀鈔

衣服有差六月乙酉賑諸王塔齊爾部民饑丁亥以各路弓矢甲匠並隸軍器監免大都南京兩路賦役以紓民力賑甘州等處諸驛辛卯汰陝西貧難軍以劉整阿爾哈雅不相能分軍為二各統之癸巳救襄陽造戰船千艘甲午改資用庫為利用監丁酉置光州等處招討司戊申經畧實都等兵至耽羅撫定其地詔以實里巴為耽羅國招討使尹邦寶副之陞拱衛直為都指揮司使日本趙良弼至太宰府而還具以日本君臣爵號州

郡名數風俗土宜來上閏月癸丑敕諸道造甲一萬弓
五千給淮西行樞密院己巳罷東西兩川統軍司辛未
以翰林院纂修國史敕采錄累朝事實備編集丙子以
平章政事賽音諤德齊行省雲南統合刺章鴨赤赤科
金齒茶罕章諸蠻賜銀二萬五千兩鈔五百錠秋七月
辛巳以金州軍八百人及統軍司還成都呼喇濟軍千
人隸東川壬午以修太廟將遷神主別殿遣烏爾古岱
張文謙祭告丙戌敕樞密院襄陽生券軍無妻子者發

至京師仍益兵衛送其老疾者遣還家庚寅河南水發粟賑民饑仍免今年田租省西涼府入永昌路戊申高麗國王王植遣其順安公王棕同知樞密院事宋宗禮賀皇后皇太子受冊禮成八月庚戌朔前所釋諸路罪囚自至大都者凡二十二人竝赦之甲寅鳳翔寶雞縣劉鐵妻一產三男復其家三年丁丑聖誕節高麗王王植遣其上將軍金詵來賀己卯賜襄陽生熟券軍冬衣有差九月辛巳遼東饑弛獵禁以赫伯為平章政事壬

午立河南宣慰司供給荆湖淮西軍需甲申襄陽生券
軍至大都詔巴延諭之釋其械繫免死罪聽自立部伍
俾征日本仍敕樞密院具鎧仗人各賜鈔娶妻於蒙古
漢人內選可為率領者丙戌劉秉忠姚樞王磐竇默圖
克坦公履等上言許衡疾歸若以太子贊善王恂主國學
庶幾衡之規模不致廢墜又請增置生員竝從之秉忠
等又奏置東宮宮師府詹事以次官屬三十八人戊子
遣官詣荆湖行省差次有功將士禁京畿五百里內射

獵已丑敕自今秋獵鹿豕先薦太廟壬辰中書省臣奏
高麗王王植屢言小國地狹比歲荒歉其生券軍乞駐
東京詔令營北京界仍敕東京路運米二萬石以賑高
麗丁酉立正陽諸驛敕河南宣慰司運米三十萬石給
淮西哈達軍仍給淮西京湖軍需有差壬寅敕會同館
專居降附之入覲者以翰林學士承旨和爾果斯兼會
同館事以主朝廷咨訪及降臣奏請征東招討使塔實
雅拉請征古珪部不允丙午置御藥院車駕至自上都

給諸王塔齊爾部布萬疋冬十月乙卯享于太廟丙辰
以西川編民東川義士軍屯田餉潼川青居戍兵敕巴
延和爾果斯以史天澤姚樞所定新格參考行之庚申
御史臺臣言沒入贓罰為鈔一千三百錠詔有貧乏不
能存者以此賑之有司斷死罪五十人詔加審覆其十
三人因鬪毆殺人免死充軍餘令再三審覆以聞禁牧
地縱火以哈達台為御史大夫陞襄陽府為路罷廣寧
府新簽軍初建正殿寢殿香閣周廡兩翼室西蜀都元

帥伊蘇岱爾與皇子鄂囉齊合兵攻建都蠻擒酋長下
濟等四人獲其民六百建都乃降詔賞將士有差十一
月癸未命布扎爾修起居注丁未大司農司言中書移
文以畿內秋禾始收請禁農民覆耕恐妨芻牧帝以農
事有益詔勿禁十二月己酉朔安圖等言實保齊巴圖
謂總管府權太重宜立運司并諸軍鄂囉以分之臣以
今之民官循例遷徙保無邪謀別立官府於民未便帝
然之壬子賜襄樊被傷軍士鈔千錠甲寅宋夏貴攻正

陽淮西行院擊走之壬戌召阿珠同呂文煥入覲大司
農司請罷西夏世官括諸色戶從之安南國王陳光昞
遣使來貢方物諸王碩色克圖以罪從軍累戰皆捷召
赴闕已已省陝州號略朱陽二縣入靈寶賜萬戶解汝
楫銀萬五千兩諸王巴喇珠率所部兵與皇子北平王
合軍討叛臣訥古伯平之賞立功將士有差賜諸王金
銀幣帛如歲例是歲諸路蟲蝻灾五分霖雨害稼九分
賑米凡五十四萬五千五百九十石天下戶一百九十

六萬二千七百九十五

十一年春正月己卯朔宮闕告成帝始御正殿受皇太子諸王百官朝賀高麗國王王植遣其少卿李義孫等來賀兼奉歲貢乙酉以金州招討使奇徹率襄陽生熟券軍千人戍鴨池庚寅初立軍官以功陞散官格免諸路軍雜賦以孟古岱等新舊軍一萬一千五百人戍建都立建都寧遠都護府兼領互市監壬辰置西蜀四川屯田經略司丁酉長春宮設周天金籙醮七晝夜敕荆

湖行院以軍三萬水弩砲手五千隸淮西行院丙午彰德趙當道等以謀逆伏誅餘從者論罪有差立于闐雅爾哈兩城水驛十三沙州北陸驛二免于闐采玉工差役阿爾哈雅言荆襄自古用武之地漢水上流已為我有順流長驅宋必可平阿珠又言臣略地江淮備見宋兵弱於往昔今不取之時不能再帝趣召史天澤同議天澤對曰此國大事可命重臣一人如安圖巴延都督諸軍則四海混同可計日而待矣臣老矣如副將者猶

足為之帝曰巴延可以任吾此事矣阿珠阿爾哈雅因言我師南征必分為三舊軍不足非益兵十萬不可詔中書省簽軍十萬人二月戊申朔賜阿珠所部將士及茶罕章阿吉老者等銀鈔有差甲寅太陰犯井宿庚申新德副元帥楊堯元戰沒以其子襲職初立儀鸞局掌宮門管鑰供帳燈燭壬申造戰船八百艘於汴梁以廉希憲為中書右丞北京等處行中書省事車駕幸上都三月己卯詔以勸課農桑諭高麗國王王植命安撫高

麗軍民總管洪察球爾提點農事己丑呂文煥隨司千
戶陳炎謀叛誅首惡二人其隨司軍併其妻子皆令內
徙庚寅敕鳳州經略使實都高麗軍民總管洪察球爾
等將屯田軍及女直軍水軍合萬五千人戰船大小合
九百艘征日本移碕門兵戍哈達城辛卯改荆湖淮西
二行樞密院為二行中書省己延史天澤竝為左丞相
阿珠為平章政事阿爾哈雅為右丞呂文煥為叅知政
事行中書省於荆湖哈達為左丞相劉整為左丞達春

董文炳為叅知政事行中書省於淮西遣使代祀嶽瀆
后土河南宣慰司言軍興轉輸煩重宜賦軍匠諸戶權
助財用從之癸巳獲嘉縣尹常德課最諸縣詔優賞之
伊齊爾吉強取民租產桑園廬舍墳墓分為特默齊軍
牧地詔還其民萬戶阿爾彬嘗發李璫逆謀為璫所殺
以其子拉爾錦襲職改金州招討司為萬戶府遣約蘇
穆爾沙津哈尚招諭博囉國帝師帕克斯巴歸土番國
以其弟琳沁襲位建大護國仁王寺成夏四月辛亥分

陝西隴右諸州置提刑按察司治鞏昌癸丑初建東宮
甲寅誅西京訛言惑衆者括諸路馬五萬匹辛未詔安
慰鄂端雅爾喀喀什噶爾等城賜襄樊戰死之士二百
四十九人之家每家銀百兩乙亥命伊蘇岱爾將千人
同薩奇蘇所部五州丁壯戍益都五月丙戌汪惟正以
所部軍逃亡乞於民站戶選補從之敕北京東京等路
新簽軍恐不宜暑權駐上都乙未樞密院臣言舊制蒙
古軍每十人月食糧者惟巴圖二人今遣集賽台哈坦

覈其數多籍二千六百七十人敕杖哈坦斥無入宿衛
謫往西川效死軍中餘定罪有差丙申以皇女呼圖克庫
哩頁額實下嫁高麗世子王湛辛丑敕隨路所簽新軍
其戶絲銀均配於民者竝除之六月丙午朔劉整乞並
甲仗及水弩手給之庚戌賜建都哈瑪爾戰士銀鈔有
差癸丑敕哈達選部下蒙古軍五千人與漢軍分戍沿
江堡隘為使傳往來之衛仍以呼巴哩巴圖翟文彬率
兵萬人掠荆南鴉山以綴宋之西兵丙辰免上都隆興

兩路簽軍庚申問罪於宋詔諭行中書省及蒙古漢軍
萬戶千戶軍士曰爰自太祖皇帝以來與宋使介交通
憲宗之世朕以藩職奉命南伐彼賈似道復遣宋京詣
我請罷兵息民朕即位之後追憶是言命郝經等奉書
往聘蓋為生靈計也而乃執之以致師出連年死傷相
藉係累相屬皆彼宋自禍其民也襄陽既降之後冀宋
悔禍或起令圖而乃執迷罔有悛心所以問罪之師有
不能已者今遣汝等水陸竝進布告遐邇使咸知之無

辜之民初無預焉將士毋得妄加殺掠有去逆效順別立奇功者驗等第遷賞其或固拒不從及逆敵者俘戮何疑甲子分遣孟古岱巴圖伯嘉努率武衛軍南征丙寅以哈喇哈斯為中書左丞崔斌叅知政事仍行河南道宣慰司事敕有司閱覈延安新軍貧無力者免之戊辰監察御史言江淮未附將帥闕人今首用阿爾哈雅子哈斯哈雅劉整子垓素不知兵且缺人望宜依弟男例罷去從之秋七月乙亥朔敕山北遼東道提刑按察

使烏魯斯布哈同參知政事廉希憲行省北京國王特
訥克母署事有大事則希憲等就議乙酉徙生券軍八
十一人屯田和琳癸巳高麗國王王植薨遣使以遺表
來上且言世子湛孝謹可付後事敕同知上都留守司
事張煥冊湛為高麗國王乙未巴延等陞辭帝諭之曰
古之善取江南者唯曹彬一人汝能不殺是吾曹彬也
興元鳳州民獻麥一莖四穗至七穗穀一莖三穗八月
甲辰朔頒諸路立社稷壇壝儀式丁未史天澤言今大

師方興荆湖淮西各置行省勢位既不相下號令必不能一後當敗事帝是其言復改淮西行中書省為行樞密院癸丑行中書省言江漢未下之州請令呂文煥率其麾下臨城諭之令彼知我寬仁善遇降將亦策之善者也從之甲寅弛河南軍器之禁卒未高麗王湛遣其樞密使朴瑯來賀聖誕節詔太原新簽軍遠戍兩川誠可憫恤諭樞密院遣使分括廩粟給其家九月丙戌行中書省以大軍發襄陽檄諭宋州郡官吏將校士民癸

已師次鹽山距郢州二十里宋兵十餘萬當郢夾漢水城萬勝堡兩岸戰艦千艘鐵絙橫江貫大艦數十過我舟師不得下惟黃家灣有溪經鷓子山入唐港可達于江宋又為埧築堡其處駐兵守之繫舟數百與埧相依巴延督諸軍攻拔之鑿埧挽舟入溪出唐港整列而進車駕至自上都冬十月己酉享于太廟庚申長河西千戶巴喇沁剽掠甲仗集衆為亂和尼齊移戍未還副元帥覃澄率屬吏赴之帝曰澄不必獨往趣益兵三千付

和尼齊合力討之壬戌歲星犯壘壁陣乙丑巴延督諸將破沙洋堡生擒守將串樓王翌日次新城總制黃順縋城降巴延遣順招都統邊居義不出總管李庭破其外堡諸軍蟻附而登拔之居義自焚死辛未賜北安王諾木罕馬三萬羊十萬十一月庚辰斷死罪三十九人壬午勅西川行樞密院伊蘇岱爾取嘉定府癸未符寶郎董文忠言比聞益都彰德妖人繼發其按察司達魯噶齊及社長不能禁止宜令連坐詔行之乙酉軍次復

州宋安撫使翟貴出降丁亥詔宋嘉定安撫咎萬壽及
凡守城將校納款來降與避罪及背主叛亡者悉從原
免癸巳東川元帥楊文安與青居山蒙古萬戶克呼克
額濟類等會兵達州直趣雲安軍至馬湖江與宋兵遇
大破之遂拔雲安羅拱高陽城堡賜文安等金銀有差
以香河荒地千頃置中衛屯巴延遣萬戶特穆爾譯史
阿里奏沙洋新城之捷且以新城總制黃順來見賜順
黃金錦衣及細甲授湖北道宣慰使佩虎符敕京師盜

詐者衆宜峻立治法召征日本呼敦呼察劉復亨薩木
哈等赴闕壬寅安圖以阿哈瑪特擅財賦權蠹國害民
官屬所用非人請別加選擇其營作宮殿賞緣為姦亦
宜詰問帝命窮治之起閣南直大殿及東西殿增選樂
工八百人隸教坊司十二月丙午已延大軍次漢口宋
淮西制置使夏貴都統高文明劉儀以戰船萬艘分據
諸隘都統王達守陽羅堡荆湖宣撫朱禔孫以游擊軍
扼中流師不得進用千戶馬福言自漢口開埧引船會

淪河口徑趨沙蕪遂入大江癸丑以諸路逃奴之無主者二千人隸行工部甲寅賞實都等征耽羅功銀鈔幣帛有差乙卯阿爾哈雅督萬戶張弘範等攻武磯堡宋夏貴以兵來援阿珠率萬戶楊恰爾等四翼軍對青山磯泊丙辰萬戶史格以一軍先渡為宋荆鄂諸軍都統程鵬飛所敗總管史塔爾琿等率衆赴敵鵬飛敗走進軍沙州抵觀音山夏貴東走遂破武磯堡斬宋都統王達始達南岸追至鄂州南門而還丁巳巴延登武磯山

宋朱禩孫遁歸江陵己未師次鄂州宋直祕閣湖北提
舉張晏然權知漢陽軍王儀知德安府來興國竝以城
降程鵬飛以本軍降巴延承制以宋鄂州民兵總制王
該知鄂州事王儀來興國仍舊任撤其戍兵分隸諸軍
下令禁侵暴凡逃民悉縱還之以阿爾哈雅兵四萬鎮
鄂漢巴延阿珠將大軍水陸東下以侍衛親軍都指揮
使圖們岱為諸軍殿以襄陽路總管賈居貞為宣撫使
商議行中書省事庚申淮西正陽火廬舍甲仗焚蕩無

餘杖萬戶阿實克布哈等有差癸亥賜太一真人李居
素第一區賜額曰太一廣福萬壽宮行中書省以渡江
捷聞敕縱呂文煥隨司軍悉還家割南陽盧氏縣隸嵩
州置歸德永城縣長武縣省入涇川良原縣省入靈臺
是歲天下戶一百九十六萬七千八百九十八諸路好
畊等蟲災凡九所民饑發米七萬五千四百一十五石
粟四萬五百九十九石以賑之

十二年春正月癸酉朔高麗國王王愷遣其判閣事李

信孫來賀及奉歲幣甲戌大軍次黃州宋沿江制置副
使知黃州陳奕以城降巴延承制授奕沿江大都督其
子巖知漣州奕遣人以書諭之書至巖即出降乙亥徙
襄陽新民七百戶於河北東川副都元帥張德潤拔禮
義城殺宋安撫使張資招降軍民千五百餘人繼遣元
帥張桂孫略地俘總管郭武及都轄唐惠等六人以歸
賜德潤金五十兩及西錦金鞍細甲弓矢部下將士鈔
三百錠戊寅劉整卒安西王相府乞給鈔萬錠為軍需

勅以千錠給之癸未師次蘄州宋安撫使管景模以城降乙酉敕樞密院以訥古德勒伊蘇岱爾所統戍軍及再簽登萊丁壯八百人付五州經略司其郟城十字路亦聽經略司節度丙戌大軍次江州宋江西安撫使知江州錢真孫及淮西路六安軍曹明以城降丁亥樞密院臣言宋邊郡如嘉定重慶江陵郢州漣海等處皆阻兵自守宜降璽書招諭從之宋知南康軍葉闔以城降敕以侍衛親軍指揮使扎達蘇囊嘉特將蒙古軍二千

伯嘉努唐古蒙果勒將漢軍萬人赴蔡州圖們岱賈孟
古岱復將餘兵赴闕己丑遣拜珠唐永堅齎詔招諭郢
州敕襄陽統軍司調兵三千人衛送永堅等還蒙古輝
和爾漢人十四人赴行中書省為新附州郡民官庚寅
遣左衛指揮副使鄭溫唐古特穆爾率衛軍萬人同扎
達蘇囊嘉特戍黃州詔諭重慶府制置司并所屬州郡
城寨官吏軍民舉城歸附壬辰以宣撫使賈居貞簽書
行中書省事戍鄂州安南國使者還敕以舊制籍戶設

達魯噶齊簽軍立站輸租及歲貢等事諭之乙未遣兵部尚書廉希賢工部侍郎嚴忠範祕書監丞柴紫芝奉國書使于宋丁酉以萬嘉努所募願為軍者萬人南征己亥雲南總管信苴日實默等刺殺合刺章舍里威之為亂者以金賞之命圖魯至雲南趣阿魯特穆爾入覲以蠻夷未附者尚多命宣慰司兼行元帥府事並聽行省節度置郡縣長選廉能者任之置雲南諸路規措所以沙木斯鼎為使益衛送唐永堅兵永堅求拜都孟古

低偕行許之敕追諸王海都巴拉金銀符三十四月
癸卯大軍次安慶府宋殿前都指揮使知安慶府范文
虎以城降巴延承制授文虎兩浙大都督甲辰以中書
右丞博囉罕為淮南都元帥中書右丞阿里左右副都
元帥仍命阿里薩奇蘇等各部蒙古漢軍會邳州又發
蘄宿戍兵將河南戰船千艘赴之遣筆且齊博囉檢覈
西夏權課命開元宣撫司賑濟喇敏新附饑民敕輝和
爾地春夏毋獵孕字獸立后土祠于平陽之臨汾伏羲

女媧舜湯河瀆等廟于河中解州洪洞趙城丙午大軍
次池州宋權州事趙昂發自經死都統制張林以城降
省西夏中興都轉運司入總管府議以中統鈔易宋交
會并發蔡州鹽貿易藥材丁未禁無籍自效軍俘掠新
附復業軍民戊申詔諭江黃鄂岳漢陽安慶等處歸附
官吏士民軍匠僧道人等令農者就耒商者就塗士庶
緇黃各安已業如或鎮守官吏妄有騷擾詣行中書省
陳告史天澤卒召游顯楊庭訓赴闕賜陳言人霍昇張

和鈔十錠俾從淮東元帥府南征庚戌遣禮部侍郎杜
世忠兵部郎中何文著齎書使日本國辛亥遣同知濟
南府事張漢英持詔諭淮東制置使李庭芝壬子洛磁
路總管姜毅捕獲農民郝進等四人造妖言惑衆敕誅
進餘減死流遠方宋都督賈似道遣計議宋京承宣使
阮思聰詣行中書省請還已降州郡約貢歲幣已延使
囊嘉特同阮思聰還報命留宋京以待使謂似道曰未
渡江時議貢議和則可今沿江諸郡皆已內屬欲和則

當來面議也。曩嘉特還，乃釋宋京，以同簽樞密院事。倪德政赴鄂州省治財賦。癸丑，御史臺臣劾前南京路總管田大成，以其弟婦趙氏為妻，廢絕人倫，敕杖八十三。年不齒時，大成已死。惟市杖趙氏八十。丙辰，賞東征元帥府日本戰功，錦絹弓矢鞍勒。庚申，遣塔布岱幹魯召鄂漢降臣張晏然等赴闕，仍諭之曰：「朕省卿所奏云：宋之權臣不踐舊約，拘留使者，實非宋主之罪。儻蒙聖慈，止罪擅命之臣，不令趙氏乏祀者，卿言良是。卿既不忘

舊主必能輔弼我家比卿奏上已遣巴延按兵不進仍遣兵部尚書廉希賢等持書往使果能悔過來附既往之愆朕復何究至於權臣賈似道尚無罪之之心况肯令趙氏之祀乎若其執迷罔悛未然之事朕將何言天其鑒之辛酉以庫庫楚率其部下軍千人及親附軍五百聽阿爾哈雅節制凡湖南州縣及瀕水之民有來附者俾庫庫楚統之拒敵不降者就為招集詔令大洪山避兵民還歸漢陽復業農畝命阿爾哈雅鎮守之復命

阿實罕唐永堅綦公直等與圖烈將甲騎千人持詔招諭郢州大軍次丁家洲戰船蔽江而下宋賈似道分遣步帥孫虎臣及督府節制軍馬蘇劉義集兵船于江之南北岸似道與淮西制置使夏貴將後軍戰船二千五百餘艘橫亘江中翌日已延命左右翼萬戶率騎兵夾岸而進繼命舉巨砲擊之宋兵陣動夏貴先遁似道錯愕失措鳴鉦斥諸軍散宋兵遂大潰阿珠與鎮撫何瑋李庭等舟師及步騎追殺百五十里得船二千餘艘及

軍資器仗督府圖籍符印似道走揚州阿實克布哈言
夏貴縱北軍岳全還稱欲內附宜降璽書招諭遂遣其
甥胡應雷持詔往諭之甲子大軍次蕪湖縣宋江東運
判知太平州孟之縉以城降都元帥博囉罕次海州知
州丁順以城降乙丑阿爾哈雅言江陵宋巨鎮地居大
江上流屯精兵不啻數十萬若非乘此破竹之勢取之
江水泛溢鄂漢之城亦恐難守從其請仍降璽書遣使
諭江陵府制置司及高達已下官吏軍民宋福州團練

使知特摩道事農士貴率知那寡州農天或知阿吉州
農昌成知上林州農道賢州縣三十有七戶十萬詣雲
南行中書省請降丙寅樞密院言渡江初亳州萬戶史
格毗陽萬戶舒穆魯紹祖輕進致敗乞罪之有旨或決
罰降官或以戰功自贖其從行省裁處禁民間賭博犯
者流之北地戊辰師次采石鎮知和州王善以城降都
元帥博囉罕次漣州宋知州孫嗣武以城降己巳復遣
拜珠唐永堅等宣諭郢州官吏士庶庚午大軍次建康

府宋沿江制置使趙潛南走都統權兵馬司事徐王榮
翁福茅世雄等及鎮軍曹旺以城降宋賈似道至揚州
始遣總管段佑送國信使郝經劉人傑等來歸救樞密
院迎經等由水路赴闕詔安南國王陳光昞仍以舊制
六事諭之趣其來朝命集賽台察罕布哈侍儀副使闕
思義真人李德和代祀嶽瀆后土車駕幸上都三月壬
申朔宋鎮江府馬軍總管石祖忠以城降行中書省分
遣淮西行樞密院安塔哈駐京口宋誅殿帥韓震其部

將李大明等二百人攜震母妻并諸子文煇文炆自臨
安來奔甲戌宋江陰軍僉判李世修以城降乙亥諭樞
密院比遣建都都元帥和尼齊征長河西以副都元帥
覃澄鎮守建都付以璽書安集其民敕安西王莽噶拉
木諸王哲伯特穆爾駙馬昌吉分遣所部蒙古軍從西
平王鄂囉齊征吐蕃命萬執中唐永堅同前所遣阿實
罕等將銳兵千人同往招諭郢州已降則鎮之不降則
從陸路與阿爾哈雅呼巴哩會於荆南丙子國信使廉

希賢等至建康傳旨令諸將各守營壘毋得妄有侵掠
宋知滁州王文虎以城降戊寅賜皇子安西王幣帛八
千匹絲萬斤己卯改平陰縣新鎮寨為肥城縣隸濟寧
府庚辰宋知寧國府顏紹卿以城降江東路得府二州
五軍二縣四十三戶八十三萬一千八百五十二口一
百九十一萬九千一百六甲申於中興路置懷遠靈武
二縣分處新民四千八百餘戶丙戌宋常州安撫戴之
泰通判王虎臣以城降國信使廉希賢嚴忠範等至宋

廣德軍獨松關為宋人所殺丁亥免諸路軍雜賦辛卯
宋將高世傑復據岳州質知州孟之紹妻子又取復州
降將翟貴妻子送之江陵世傑會郢復岳三州及上流
諸軍戰船數千艘兵數萬人扼荊江口壬辰阿爾哈雅
以軍屯于東岸世傑夜半遁去黎明至洞庭湖口兵船
成列而陣阿爾哈雅督諸翼萬戶及水軍張榮寶解汝
楫等逐世傑于湖口之夾灘遣郎中張鼎召世傑世傑
降阿爾哈雅以世傑招岳州孟之紹亦以城降以世傑

力屈而降誅之賜北平王諾木歡所部馬二千一百八十羊三百癸巳敕郟城沂州十字路戍兵從博囉罕征淮南丙申側布番官稅昔確州番官莊察男車甲等率四十三族戶五千一百六十詣四川行樞密院來附戍戍遣山東路經略使王儼戍岳州庚子從王磐實默等請分置翰林院專掌蒙古文字以翰林學士承旨薩迪密迪哩主之其翰林兼國史院仍舊纂修國史典制誥備顧問以翰林學士承旨兼修起居注和爾果斯主之

辛丑敕阿珠分兵取揚州夏四月壬寅朔賞討長河西
巴喇沁有功者及陣亡者金銀鈔幣帛各有差乙巳改
西夏中興道按察司為隴右河西道丙午立漣州新城
清河三驛阿爾哈雅駐軍江陵城南沙市攻其柵破之
知荆門軍劉懋降丁未阿爾哈雅遣郎中張鼎齋詔入
江陵宋荆湖制置朱禔孫湖北制置副使高達京西湖
北提刑青陽夢炎李湜始出降阿爾哈雅入江陵分道
遣使招諭未下州郡知峽州趙真知歸州趙仔權澧州

安撫毛浚常德府新城總制魯希文舊城權知府事周公明等悉以城降辛亥遣使招諭宋五郡鎮撫使呂文福使降甲寅諭中書省議立登聞鼓如為人殺其父母兄弟夫婦冤無所訴聽其來擊其或以細事唐突者論如法辛酉宋郢州安撫趙孟復州安撫翟貴以城降宋度支尚書吳浚移書建康徐王榮等述其丞相陳宜中語請罷兵通好已延遣中書議事官張羽淮西行院令史王章同宋來使馬馭持徐王榮復書至平江府驛亭

悉為宋所殺癸亥阿珠師駐瓜洲距揚州四十五里宋
淮東制置司焚城中廬舍遷其居民而去阿珠創立樓
櫓戰具以守之丙寅立尚牧監賜降臣丁順等衣服免
京畿百姓今歲絲銀丁卯以大司農御史中丞博囉為
御史大夫罷隨路巡行勸農官以其事入提刑按察司
括諸寺拉木伊克人口庚午以高達為叅知政事詔慰
諭之遣兵部郎中王世英刑部郎中蕭郁持詔召嗣漢
四十代天師張宗演赴闕五月辛未朔阿爾哈雅以所

俘童男女千人牛萬頭來獻樞密院言峽州宜以戰船
扼其津要又郢復二州戍兵不足今擬襄陽等處選五
千七百人隸行中書省聽阿爾哈雅調遣從之詔中書
右丞廉希憲叅知政事托博和囉哈圖行中書省于江
陵府阿爾哈雅還鄂州立襄陽至荆南三驛丁丑阿珠
立木柵于楊子橋斷淮東糧道且為瓜洲藩蔽庚辰詔
諭叅知政事高達曰昔我國家出征所獲城邑即委而
去之未嘗置兵戍守以此連年征伐不息夫爭國家者

取其土地人民而已雖得土地而無民其誰與居今欲
保守新附城壁使百姓安業力農蒙古人未之知也爾
熟知其事宜加勉旃湖南州郡皆汝舊部曲未歸附者
何以招懷生民何以安業聽汝為之宋嘉定安撫咎萬
壽遣部將李立奉書請降言累負罪愆乞加赦免詔遣
使招諭之辛巳宋知辰州呂文興黃仙洞行隋州事傳
安國仙人寨行均州事徐鼎知沅州文用圭知靖州康
王知房州李鑑等皆以城降荆南湖北路凡得府三州

十一軍四縣五十七戶八十萬三千四百一十五口一百一十四萬三千八百六十丙戌以三衛新附生券軍赴巴達山屯田丁亥召巴延赴闕以蒙古萬戶阿魯罕權行中書省事遣肅州達魯噶齊阿實克簽河西軍萬戶阿實克布哈達巴延節制擅撤戍兵詔追奪符印使從軍自效淮東宣撫陳巖乞解官終喪不許申嚴屠牛馬之禁庚寅宋五郡鎮撫使呂文福來降壬辰宋都統制劉師勇殿帥張彥據常州癸巳諭高麗國王王湛招

珍島餘黨之在耽羅者六月庚子朔日有食之宋嘉定
安撫使咎萬壽以城降賜名順癸卯遣兩浙大都督范
文虎持詔往諭安豐壽州招信五河等處鎮戍官吏軍
民遣刑部侍郎拜珠諭朱禩孫以年老多病不任朝謁
權留大都無自疑懼諭廉希憲等元沒青陽夢炎李湜
家貲如籍還之併徙其家赴都甲辰以萬戶阿嚙罕為
行中書省叅知政事獲知開州張章赦其罪章二子柱
楫先來降以其子故免死敕實里巴史樞率襄陽熟券

軍二千獵戶丁壯二千同范文虎招安豐軍各賜馬十匹其故嘗從丞相史天澤者十九人願宣勞軍中令從樞以行戊申簽平陽西京延安等路達嚕噶齊弟男為軍辛亥賞諸王烏嚕所部獲功建都者三十五人銀鈔有差定烏嚕衛士人各馬二疋從者一匹敕淮東元帥府發兵及鄂州戍兵與李璫舊部曲并前河南已簽軍萬人後免為民者復籍為兵並付行中書省戊午詔遣使招諭宋四川制置趙定應比者畢再興青陽夢炎赴

闕面陳蜀閫事宜奏請緩師令自納款姑從所請今遣
再興宣布大信若能順時達變可保富貴毋為塗炭生
靈自貽後悔庚申遣重慶府招討使畢再興持詔招諭
宋合州節使張珏江安潼川安撫張朝宗涪州觀察陽
立梁山軍防禦馬璘辛酉宋潼川安撫使知江安州梅
應春以城降乙丑以漣海新附丁順等括船千艘送淮
東都元帥府丙寅宋揚州都統姜才副將張林步騎二
萬人乘夜攻楊子橋木柵守柵萬戶史弼來告急阿珠

自瓜洲以兵赴之詰旦至柵下才軍夾水為陣阿珠麾騎兵渡水擊之陣堅不動阿珠軍引却才軍來逼我軍與力戰才軍遂走阿珠麾步騎並進大敗之才僅以身免生擒張林斬首萬八千級戊辰敕達春率安塔哈伊蘇岱爾軍赴漣水以蘇爾坦為耽羅國達嚕噶齊罷山東經略司秋七月庚午朔阿珠集行省諸翼萬戶兵船于瓜洲安塔哈董文炳集行院諸翼萬戶兵船于西津渡宋沿江制置使趙潛樞密都承旨張世傑知泰州孫

虎臣等陳舟師于焦山南北阿珠分遣萬戶張弘範等以巴圖兵船千艘西掠珠金沙辛未阿珠安塔哈登南岸石公山指授諸軍水軍萬戶劉琛循江南岸東趣夾灘繞出敵後董文炳直抵焦山南麓以倚其右招討使劉國傑趣其左萬戶呼喇珠擣其中張弘範自上流繼至趣焦山之北大戰自辰至午呼聲震天地乘風以火箭射其窮篷宋師大敗世傑虎臣等皆遁走追至圖山獲黃鵠白鷁船數百艘宋人自是不復能軍翌日宋平

江都統劉師勇殿帥張彥以兩浙制司軍至呂城復為
安塔哈行院兵所敗壬申簽雲南落落蒲納烘等處軍
萬人隸行中書省癸酉太白犯井詔取茶罕章未附種
落丁丑立衛州至楊村水驛五己卯增置燕南河北道
提刑按察司以蔡州驛蒙古軍四百隸阿爾哈雅漢軍
六百從萬戶宋都木達赴江西壬午遣使招宋淮安安
撫朱煥癸未詔遣使江南搜訪儒醫僧道陰陽人等敕
左丞相巴延率諸將直趨臨安右丞阿爾哈雅取湖南

蒙古萬戶宋都木達漢軍萬戶武秀張榮實李恒兵部
尚書呂師夔行都元帥府取江西罷淮西行樞密院以
右丞安塔哈叅政董文炳同署行中書省事辛卯太陰
犯畢甲午遣使持詔招宋李庭芝及夏貴以巴延為中
書右丞相阿珠為中書左丞相八月己亥免北京西京
陝西等路今歲絲銀癸卯巴延陛辭南行奉詔諭宋君
臣相率來附則趙氏族屬可保無虞宗廟悉許如故授
故奉使大理王君侯子如珪正八品官己未升任城縣

為濟州辛酉車駕至自上都丙寅高麗王王愷遣其樞
密副使許珙將軍趙珪來賀聖誕節九月己巳太白犯
少民庚午阿哈瑪特等以軍興國用不足請復立都轉
運司九量增課額鼓鑄鐵器官為局賣禁私造銅器乙
亥賞清河新城戰士及死事者銀千兩鈔百錠賜西平
王所部雅爾城戍兵人馬三匹丁丑以襄陽官牛五千
八百賜貧民弛河南鬻馬之禁賜東西川屯戍蒙古軍
糧鈔有差戊寅諭太常卿哈坦去冬享太宮敕牲無用

牛今其復之己卯太白犯太微西垣上將壬午阿珠築
灣頭堡乙酉罷襄陽統軍司甲午宋揚州都統姜才將
步騎萬五千人攻灣頭堡阿珠安塔哈擊敗之賞淮安
招討使奇爾默色及有功將士錦衣銀鈔有差丙申以
伊實特穆爾為御史大夫括江南諸郡書版及臨安祕
書省乾坤寶典等書冬十月戊戌朔享于太廟辛丑弛
北京義錦等處獵禁癸丑太陰犯畢十一月丁卯阿爾
哈雅以軍攻潭州乙亥巴延分軍為三趣臨安阿嚙罕

率步騎自建康四安廣德以出獨松嶺董文炳率舟師
循海趣許浦澈浦以至浙江巴延安塔哈由中道節度
諸軍期並會于臨安丙子宋權融宜欽三州總管岑從
毅沿邊巡檢使廣西節制軍馬李維屏等詣雲南行中
書省降丁丑阿哈瑪特奏立諸路轉運司凡十一已卯
宋都木達等軍次隆興宋江西轉運使知府劉槃以城
降都元帥府檄諭江西諸郡相繼歸附得府州六軍四
縣五十六戶一百五萬一千八百二十九口二百七萬

六千四百壬午已延大軍至常州督諸軍登城四面並
進拔其城劉師勇變服單騎南走改順天府為保定府
樞密院言兩都平灤獵戶新簽軍二千皆貧無力者宜
存恤其家又新附郡縣有既降復叛及糾衆為盜犯罪
至死者既已款伏乞聽權宜處決皆從之中書省臣議
斷死罪詔今後殺人者死問罪狀已白不必待時宜即
行刑其奴婢殺主者具五刑論乙酉阿嚙罕克廣德趣
獨松關丙戌太陰犯軒轅大星已丑遣太常卿哈坦以

所獲塗金爵三獻于太廟庚寅巳延遣降人游介實奉
璽書副本使于宋仍以書諭宋大臣甲午以高麗國官
制僭濫遣使諭旨凡省院臺部官名爵號與朝廷相類
者改正之十二月戊戌填星犯亢巳亥簽書四川行樞
密院事咎順言紹慶府施州南平及諸蠻呂告馬蒙阿
永等有嚮化之心又播州安撫楊邦憲思州安撫田景
賢未知逆順乞降詔使之自新並許世紹封爵從之辛
丑董文炳軍次許浦宋都統制祁安以本軍降宋主為

書介國信副使嚴忠範姪煥請和甲辰巴延次平江府
宋都統王邦傑以城降乙巳免江陵等處今歲田租丁
未改諸站提領司為通政院戊申中書左丞相呼圖克
岱爾與内外文武百寮縉黃耆庶請上皇帝尊號曰憲
天述道仁文義武大光孝皇帝皇后曰貞懿順聖昭天
睿文光應皇后不許太陰犯畢庚子宋主復遣尚書夏
士林右史陸秀夫奉書稱姪乞和西川滄溪知縣趙龍
遣間使入宋敕流遠方籍其家癸亥敕樞密院靖州既

降復叛今已平定其遣張通判李信家屬并同叛者赴
都甲子荅宋國主書令其來降丙寅阿嚙罕軍次安吉
州宋安撫使趙與可以城降升高麗東寧府為路割江
東南康路隸江西省置馬湖路總管府省重慶路隆化
縣入南川瀼州海山縣入昌黎縣復華州鄭縣是歲衛
輝太原等路旱河間霖雨傷稼凡賑米三千七百四十
八石粟二萬四千二百六石天下戶四百七十六萬四
千七十七斷死罪六十八人

元史卷八

元史卷八考證

世祖聖德神功文武皇帝紀十二年二月戊辰知和州

王善以城降

臣祖庚

按宋史善作喜

元史本紀卷八考證

至元十二年三月己卯改平陰縣新鎮寨為肥城縣

案己卯原文誤作乙卯考上文為丙子戊寅下文為
庚辰甲申今據改正

四月丁未宋權澧州安撫毛浚等以城降 案澧州原

本誤作豐州上文阿爾哈雅入江陵遣使招諭州郡
故峽歸澧州常德府並降皆宋湖北路所屬也今據
改

五月丁丑阿珠立木柵於楊子橋為瓜州藩蔽 洲字

原本誤州今改正

六月戊午詔諭趙定應比者畢再興赴闕面陳蜀閬事宜 面字原本誤西今據文義改

八月己亥免北京等路絲銀 案七月庚午朔至己亥三十日既係之八月應為朔日